

SAMOA

Faatulagaina o Aiaiga

**VAEGA I
FAATOMUAGA**

1. Igoa puupuu ma le amataga
2. Faamatalaina o uiga o upu
3. Sini o le Tulafono
4. E le faatapulaaina i le Tulafono le tuuina atu o nisi fesoasoani
5. E leai se pule faataga o le Tulafono mo le aumaia po o le tuueseina atu o so o se tagata

**VAEGA II
TALOSAGA I MALO I FAFO**

6. Faaaogāina o lenei Vaega
7. Talosaga e tatau ona faia e le Loia Sili
8. Fesoasoani i le faailoaina atu po o e iloagofie ai tagata
9. Fesoasoani i le mauaina mai o faamatalaga molimau
10. Avanoa e suesueina ai po o le fesiligia o tagata ua tuuina atu faamatalaga molimau po o tuuina atu pepa aloaia
11. Fesoasoani i le fetuunaiga o le auai o tagata

12. E le faaeeina atu faasalaga pe a teena le tuuina mai o le maliega
13. Taofia o pagota mai Malo i fafo
14. Puipuiga mausali ma tulaga aloaia
15. Tapulaa o le faaaogāina o faamatalaga molimau
16. Fesoasoani i le tuuina atu o pepa aloaia
17. Fesoasoani i le mauaina mai o meafaitino po o isi mea
18. Talosaga mo le faamallosia o poloaiga ua faia i lalo o le Tulafono o Tupe Maua Mai i Soligatulafono
19. Talosaga mo le tuuina atu o tusi faapoloaiga po o poloaiga i Malo i fafo
20. Faatapulaaina o le faaaogāina o faamatalaga molimau

**VAEGA III
TALOSAGA E FAIA E MALO
I FAFO**

21. Faaaogāina o lenei Vaega
22. Talosaga e ao ona faia i le Loia Sili
23. Faiga o talosaga
24. Teena o fesoasoani

25. Faasilasilaga o le teena o talosaga
26. E mafai ona tuuina atu fesoasoani i le noatia ma le fai fuafua i tuutuuga
27. Fesoasoani i le faailoaina po o le faailoagofieina o tagata
28. Fesoasoani i le mauaina o faamatalaga molimau i totonu o Samoa
29. Nisi aiaiga e faasino i le mauaina o faamatalaga molimau
30. Puipuiga o tagata molimau
31. Faafoega o taualumaga
32. E mafai ona faatinoina e le Resitara malosiaga o le Faamasino
33. Fesoasoani i fetuunaiga o le auai o se tagata e tuuina atu faamatalaga molimau i Malo i fafo
34. Fesoasoani i le faia o fetuunaiga o le auai atu o se pagota
35. Gaoioiga e manaomia mai i Malo i fafo
36. E le faaeeina atu faasalaga mo le teena o le tuuina atu o maliega
37. Taunuuga o le aveese atu i Malo i fafo o se pagota o lo o nofosala i le falepuipui
38. Puipuiga o tagata e uia Samoa
39. Fesoasoani i le mauaina o meafaitino po o se mea e ala i le sueina ma faoa faamalosia
40. Tusi poloaiga e sueina ai
41. Faiga ma mataupu i totonu o se tusi poloaiga e sueina ai
42. Malosiaga ua faaeeina atu i le tusi poloaiga
43. Faoa faamalosi o isi mea

44. Puipuia ma le lafoaia o mea sa faoa faamalosi
45. Ia tuuina atu e le Loia Sili le tusi faamaonia i le sueina ma le faoa faamalosia

Fesoasoani i le Faatulagaga o le Faaoina atu o Taulumaga

46. Fesoasoani i le faatulagaina o le faaoina atu o taualumaga
47. Gaoioiga e manaomia mai Malo i fafo
48. E leai se faasalaga e faaeeina atu mo le lē tausisia o le tusi poloaiga
49. Talosaga mo le faamalosia o poloaiga a Malo i fafo e aveesea faamalosi ai
50. Talosaga mo le faamalosia a a Malo i fafo e taofia ai
51. Auala e faamauina ai poloaiga a Malo i fafo
52. Taunuuga o le faamauina o poloaiga a Malo i fafo
53. Faalēaogāina o le faamauina o poloaiga a Malo i fafo
54. Talosaga mo se tusi poloaiga e sueina ai e tusa ai o meatotino ua afaina
55. Talosaga mo le poloaiga e taofia ai
56. Talosaga mo se poloaiga mo le auina atu o pepa aloaia
57. Talosaga mo le poloaiga e mataituina ai

**VAEGA IV
TALOSAGA UA FAIA E SE
TAGATA UA MOLIA PO O
UA FAIA E AVEA AI MA
ONA SUI**

58. Talosaga e faia e le Loia Sili e aveia ai ma sui o se itu tetee

**VAEGA V
TALIAINA O
FAAMATALAGA MOLIMAU
MAI MALO I FAFO**

59. Faamatalaina o uiga o upu mo le Vaega V
60. Taulumaga o lo o faaaogāina i ai lenei Vaega
61. Talosaga mo meafaitino a Malo i fafo
62. Manaoga mo faamatalaga molimau
63. Auala e faia ai faamatalaga molimau
64. E mafai ona faaaogāina se meafaitino mai Malo i fafo e ave ma faamatalaga molimau
65. Faatonuga ina ia taofia le faaaogāina o meafaitino mai Malo i fafo
66. Tusi faamaonia e faasino i meafaitino mai Malo i fafo

67. Taunuuga o le Vaega V i aia tatau e susesueina ai tagata molimau
68. Faagaoioia o isi tulafono

**VAEGA VI
AIAIGA ESEESE**

69. Faamaoniga o tulaga moni o pepa aloaia
70. Tulaga taualoa o pepa aloaia mai Malo i fafo
71. Faasoaina ma Malo i fafo o meatotino ua aveesea faamalosi
72. Ia teuina tupe maua mai meatotino ua aveesea faamalosi i le Faaputugatupe o Aseta ua Aveesea Faamalosi
73. Tulafono Faatonutonu
74. Soloaiga

2007, Nu. 3

O SE TULAFONO e faafaigofie ai le tuuina atu ma le maua mai o fesoasoani faava o malo e uiga i Mataupu tau Soligatulafono.
[30 Ianuari 2007]

UA FAIA e le Fono Aoao Faitulafono o Samoa i totonu o le Palemene ua potopoto e faapea:

**VAEGA I
FAATOMUAGA**

1. Igoa puupuu ma le amataga-(1) E mafai ona taua lenei Tulafono o le Tulafono o Fesoasoani Soofaatasi i Mataupu tau Soligatulafono 2007.

(2) O lenei Tulafono po o so o se vaega po o sona fuaiupu e tatau ona amata faamamaluina i le aso po o aso ua filifilia e le Minisita.

(3) O le Faasilasilaga o le amata faamamaluina o lenei Tulafono po o so o se vaega po o fuaiupu e tatau ona lomua faasalalau i le gagana Samoa ma le gagana Peretania i le Savali ma se isi nusipepa o lo o faasalalauina i totonu o Samoa.

2. Faamatalaina o uiga o upu-(1) I totonu o lenei Tulafono, ae vagana ai ua manaomia e le mataupu se isi uiga e ese ai:

“tagata ofisa faatagaina mo se aiaiga o lenei Tulafono” o lona uiga o se tagata, po o se tagata i se vasega o tagata ua tofia e le Loia Sili i se faiga tusitusia e avea o se tagata ofisa faatagaina mo le aiaiga;

“Pulega Agavaa e faasino i so o se Malo i fafo” o lona uiga o le tagata po o pulega ua tofia mo le taimi nei e lea Malo i fafo mo faamoemoega o le faaliliuina po o le taliaina o talosaga ua faia i lalo po o e tusa ai o lenei Tulafono;

“poloai e aveesea faamalosi ai” o lona uiga o se poloai e faamatuu atu ai po o se poloai e faasalaga tau tupe;

“suesuega o soligatulafono” o lona uiga:

(a) o se sueduega ua amataina i totonu o Samoa e tusa ai o se solitulafono ua faia, po o ua masalomia i luga o mafuaaga talafeagai e faapea ua faia po o pe ono faia e faasaga i le tulafono a Samoa; po o

(b) e faasino i se Malo i fafo, o se sueduega ua amataina i totonu o se Malo i fafo e tusa ai o se solitulafono ua faia, po o ua masalomia i luga o mafuaaga talafeagai na faia po o e faaono mafai ona faia, e faasaga i le tulafono o lea Malo i fafo.

“mataupu tau soligatulafono” o lona uiga o sueduega o soligatulafono ma taualumaga faasolitulafono ma e aofia ai se mataupu (e aliae mai i lalo o tulafono o Samoa po o se isi Malo i fafo) e faasino i:

- (a) le faamatuu atu po o le aveesea faamalosi o meatotino mo se solitulafono; po o
 - (b) le taofia o faiga e tagofia ai meatotino ia e mafai ona faamatuu atu pe aveesea faamalosi mo se solitulafono;
- “taualumaga faasolitulafono” o lona uiga:
- (a) o taualumaga ua faia e tusa ai o se solitulafono ua faia, po o ua masalomia i luga o mafuaaga talafeagai e faapea ua maea ona faia e faasaga i le tulafono a Samoa, ma e aofia ai le suesueina o se tagata mo le solitulafono ma so o se taualumaga e fuafua ai pe tatau ona suesueina se tagata pe leai i luma o le faamasinoga mo le faia o le solitulafono; po o
 - (b) e faasino i se Malo i fafo, taualumaga ua faia e tusa ai ma se solitulafono ua faia, po o ua masalomia i luga o mafuaaga talafeagai e faapea ua uma ona faia e faasaga i le tulafono a lea Malo i fafo, ma e aofia ai le suesueina o se tagata mo le solitulafono ma so o se taualumaga e fuafua ai pe tatau ona suesueina i luma o le faamasinoga se tagata mo le solitulafono pe leai;
- “faamatalaga faamauiina” o lona uiga o so o se ituaiga o faamatalaga po o mafaufauga e faavae ai;
- “pepa aloaia” o lona uiga o so o se faamaumauga o faamatalaga, ma e aofia ai:
- (a) so o se mea o lo o i ai i totonu tusitusiga; ma
 - (b) so o se mea o lo o i ai i luga ni faailoga, fuainumera, faailoga e iloa ai po o mea faapupu e i ai se uiga mo tagata ua agavaa latou te faamatalaina le uiga; ma
 - (c) so o se mea e mafai ona maua mai ai leo, ata faafoliga po o tusitusiga, ua i ai pe aunoa ma le fesoasoani a so o se isi mea; ma
 - (d) se faafanua, fuafuaga, ata tusia, ata e pueina po o mea faapena; ma
 - (e) se pepa aloaia faaeletoroni;

- “ata fesi” o lona uiga o se ata e maua mai pe na lafoina e ala i le masini fesi;
- “poloaiiga mai fafo e aveesea faamalosi ai” o lona uiga o se poloaiiga mai fafo e faamatuu ai po o se poloaiiga o faasalaga tau tupe mai fafo;
- “poloaiiga mai fafo e faamatuu atu ai” o lona uiga o se poloaiiga ua faia i lalo o le tulafono a se Malo i fafo ua faaogaina e so o se faamasinoga po o isi pulega faa-faamasinoga, mo faamoemoega o le aveesea faamalosi po o le faamatuu atu o meatotino e tusa ai ma po o le toe faaolaina mai o tupe e maua mai i se solitulafono ogaoga;
- “tusi faamaonia o puipuiga mausali o le tulafono mai Malo i fafo” o lona uiga o se tusi faamaonia po o se tautinoga ua tuuina atu po o ua faia e se Malo i fafo po o i lalo o se tulafono a se Malo i fafo o lo o taua ai faapea, i lalo o le tulafono a se Malo i fafo, e mafai pe le mafai e tagata lautele po o se tagata faapitoa, i se taualumaga lautele po o taualumaga maoti i tulaga lautele po o tulaga aliae maoti, ona manaomia ai le:
- (a) tali atu i se fesili faapitoa; po o
 - (b) tuuina atu o se pepa aloaia faapitoa;
- “pagota a atunuu ese” o lona uiga o se tagata o ia lea o lo o taofia faaletulafono i totonu o se Malo i fafo e faatali ai le suesuega po o ua faasalaina mo, po o i lalo o se faasalaga e nofosala ai i le falepuipui mo se solitulafono ua faia faasaga i le tulafono a lea Malo i fafo, ae peitai e le aofia ai se tagata o ia lea o lo o saoloto, ona ua sola ese mai puipuiga faaletulafono;
- “Minisita” o lona uiga o le Minisita o Tupe;
- “pagota” o lona uiga o se tagata o ia lea ua taofia faaletulafono e faatali ai se suesuega po o lona faasalaina, po o le nofosala i le falepuipui mo se solitulafono e faasaga i se tulafono a Samoa, ae le aofia ai se tagata o lo o saoloto ona ua sola ese mai puipuiga faaletulafono;
- “Tulafono o Tupe Maua mai i Soligatulafono” o lona uiga o le Tulafono o Tupe Maua Mai i Soligatulafono 2007;

“taualumaga” o lona uiga o so o se tusi samania, tusi faapoloaiga, poloaiga po o isi pepa aloaia ua tuuina atu e so o se faamasinoga po o e so o se Faamasino po o le Resitara;

“Malo o lo o talosaga”, e faasino i se talosaga mo fesoasoani ua faia i lalo o le Vaega III, o lona uiga o le Malo i fafo lea na faia lea talosaga;

“suesuega” mo se solitulafono i totonu o se Malo i fafo, e aofia ai se taualumaga e fuafua ai pe tatau ona molia le tagata i le solitulafono;

“fesootaiga e ala i ata ma leo po o initaneti” o lona uiga o se faiga, e aofia ai se fesootaiga tau initaneti lea e avanoa ai tagata o lo o nonofo faatasi i se nofoaga e tasi e matamata, faalogologo ma talanoa i tagata o lo o nonofo faatasi i se isi nofoaga.

(2) Seia vagana ai pe afai ua i ai se isi faamoemoe ua aliali mai, o se faaupuga lea o lo o faaaogāina i totonu o lenei Tulafono ma o lo o faamatalaina i totonu o le Tulafono o Tupe Maua mai i Soligatulafono o lo o i totonu o lenei Tulafono e i ai lona uiga tutusa e pei ona i ai i le Tulafono o Tupe Maua Mai i Soligatulafono.

(3) O se faasinomaga i totonu o lenei Tulafono i le tulafono o Samoa po o so o se Malo i fafo e aofia ai faasinomaga i se tulafono ua tusia po o se tulafono e le i tusia o, po o faamamaluina i totonu o so o se vaega o Samoa po o lea Malo i fafo, po o le a lava le tulaga e i ai.

(4) Afai:

(a) o se Malo i fafo e aofia ai le tuufaatasiga o ni Malo, po o e sili atu i le tasi ituaiga tulafono o lo o faaaogāina, po o e i ai so o se faalapotopotoga e tasi po o e sili atu e pulea faaitumalo; ma

(b) e sili atu i lo le tasi Pulega Agavaa e tofia mo lea Malo i fafo,

o se faasinomaga i totonu o lenei Tulafono i le Pulega Agavaa a lea Malo i fafo e faasino i se talosaga mo fesoasoani ua faia e tusa ai ma lenei Tulafono, o lona uiga o le Pulega Agavaa mo lea Malo i fafo lea, i le aliae mai o le tulaga faapitoa, o le Pulega Agavaa talafeagai e faaliliuina po o le a lava le tulaga e i ai, ona taliaina le talosaga.

(5) O se faasinomaga i totonu o lenei Tulafono e faia i le tulafono a se Malo i fafo e aofia ai se faasinomaga i le tulafono po o se vaega o, po o le tulafono o lo o aloaia i se vaega o le Malo i fafo.

3. Sini o le Tulafono – O le sini o lenei Tulafono ia mafai e Samoa ona tuuina atu ma maua mai fesoasoani faava o malo i mataupu tau soligatulafono, e aofia ai ae le faatapulaaina i:

- (a) le faailoagofie ai ma le faailoa atu o se tagata; ma
- (b) mauaina mai o faamatalaga molimau, pepa aloaia po o so o se isi lava meafaitino; ma
- (c) tuuina atu pepa aloaia po o isi meafaitino; ma
- (d) faatulaga tagata mo le tuuina atu o faamatalaga molimau po o le fesoasoani i suesuega; ma
- (e) tuuina atu pepa aloaia; ma
- (f) faatinoina talosaga mo le sailia ma le faoa faamalosia; ma
- (g) faamatuueseina atu po o le aveesea faamalosi o tupe mai i solitulafono; ma
- (h) toe faaolaina mai o faasalaga tau tupe e tusa ai o soligatulafono; ma
- (i) taofia o le tagofiaina o meatotino po o le taofia o aseta, ia e ono faamatuu atu pe aveesea faamalosi, po o lea e faaono manaomia e faamalieina ai faasalaga tau tupe ua faaee atu e tusa ai o soligatulafono ogaoga; ma
- (j) faailoa atu meatotino ia e faaono mafai ona faamatuu atu, po o ia e ono manaomia e faamalieina ai faasalaga tau tupe ua faaee atu e tusa ai o soligatulafono ogaoga.

4. E le faatapulaaina i le Tulafono le tuuina atu o nisi fesoasoani – E lei se mea i totonu o lenei Tulafono e tataui ai ona faatapulaa:

- (a) le malosiaga o le Loia Sili, e ese mai i lenei Tulafono, e faia ai talosaga i Malo i fafo po o le

gaoioi ai i luga o talosaga mai Malo i fafo mo fesoasoani i le suesueina po o tualumaga i se mataupu tau soligatulafono; po o

- (b) le malosiaga o so o se isi tagata po o le faamasinoga, e ese mai i lenei Tulafono, e faia ai talosaga i Malo i fafo pe gaoioi ai i luga o talosaga mai Malo i fafo mo ituaiga fesoasoani faava o malo; po o
- (c) le uiga moni po o le lautele o fesoasoani i mataupu tau soligatulafono lea e mafai ona tuuina atu faaletulafono e Samoa po o e maua mai i Malo i fafo; po o
- (d) ituaiga galuega soofaatasi o lo o i ai i le taimi nei (e aloaia pe e le aloaia) e tusa ai o mataupu tau soligatulafono i le va o Samoa ma so o se isi Malo i fafo po o le atiaeina o isi ituaiga galuega soofaatasi.

5. E leai se pule faataga o le Tulafono mo le aumaia po o le tuueseina atu o so o se tagata – E leai se mea i totonu o lenei Tulafono e faatagaina ai:

- (a) le aumaia po o le tuueseina atu po o le tuuina atu o so o se tagata; po o
- (b) le pueina po o le taofia, faatasi ai ma se manatu e aumaia po o le tuueseina atu po o le tuuina atu o so o se tagata.

VAEGA II TALOSAGA I MALO I FAFO

6. Faaaogāina o lenei Vaega – O se talosaga e faia mo fesoasoani i lalo o lenei Vaega e ono mafai ona faia i so o se Malo i fafo e tusa ai o se soligatulafono ogaoga.

7. Talosaga e tatau ona faia e le Loia Sili – O se talosaga a Samoa mo fesoasoani i lalo o lenei Vaega e tatau ona faia e po o e ala atu i le Loia Sili.

8. Fesoasoani i le faailoaina atu po o e iloagofie ai tagata - Afai ua faamalieina le Loia Sili e faapea o lo i ai mafuaaga talafeagai e talitonu ai e faapea o lo o i ai i totonu o so o se Malo i fafo se tagata o ia lea:

- (a) o po o e ono afaina i, po o e aafia i so o se mataupu tau soligatulafono i totonu o Samoa; po o
- (b) e mafai ona aveina atu po o le tuuina atu o faamatalaga molimau po o fesoasoani e talafeagai ma so o se mataupu tau soligatulafono i totonu o Samoa,

e mafai ona talosagaina e le Loia Sili se Malo i fafo e fesoasoani i le faailoaina atu o lea tagata po o afai e le o iloa le faamatalaga e iloa ai le tagata, i le faailoaina atu ma ilogafie ai lea tagata.

9. Fesoasoani i le mauaina mai o faamatalaga molimau-(1) Afai ua faamalieina le Loia Sili e faapea o lo o i ai mafuaaga talafeagai e talitonuina ai so o se faamatalaga molimau po o pepa aloaia po o i isi meafaitino o le a talafeagai i so o se mataupu faasolitulafono i totonu o Samoa, e mafai e le Loia Sili ona talosaga se Malo i fafo e faatulaga mo:

- (a) ia faamatalaga molimau ina ia aveina atu i Malo i fafo; ma/po o
- (b) le tuuina atu o sea pepa aloaia po o isi meafaitino o le a tuuina atu i le Loia Sili.

(2) E mafai ona faatagaina se pepa aloaia (e ese ai i lo se faamatalaga tauto) ua maua mai se Malo i fafo e tusa ai ma se talosaga na faia i lalo o le faafuaiupu (1), i le noatia ma le fai fuafua i tulafono faafoe o tulafono e faasino i le faatagaina o faamatalaga molimau, e aveia ma faamatalaga molimau i le fofogaina o le taulumaga o solitulafono lea e faasino i ai le talosaga.

(3) E tatau ona taliaina se faasilasilaga tau faamasinoga i luga o so o se faamau faailoga po o saina ua i ai faatasi, faapipii i ai, faaopoopo po o ua tuuina i luga po o i so o se faamatalaga tauto (so o se igoa o iloa ai) ua tuuina atu e fai ma faamatalaga molimau i lalo o lenei fuaiupu po o lalo o le Vaega V.

Soligatulafono

10. Avanoa e suesueina ai po o le fesiligia o tagata ua tuuina atu faamatalaga molimau po o tuuina atu o pepa aloaia – I le faia ai o se talosaga i lalo o le fuaiupu 9, e mafai foi e le Loia Sili ona talosaga e faapea ia tuuina atu se avanoa mo le tagata o lo o tuuina atu faamatalaga molimau po o le tuuina atu o le pepa aloaia po o isi meafaitino, ina ia suesueina pe fesiligia e ala i le faaaogāina o ata vito po o fesootaiga faainitaneti po o so o se isi lava auala e faia ai mai Samoa e:

- (a) se vaega i le tualumaga; po o
- (b) se tagata ua suesueina.

11. Fesoasoani i le fetuunaiga o le auai o tagata-(1) Afai ua faamalieina le Loia Sili e faapea o lo o i ai mafuaaga talafeagai e talitonuina e faapea e mafai e se tagata o lo o i Malo i fafo ona aveina atu po o le tuuina atu o faamatalaga molimau po o fesoasoani e talafeagai i so o se mataupu tau soligatulafono i totonu o Samoa, e mafai e le Loia Sili ona talosagaina lea Malo i fafo ina ia fesoasoani i le faatulagaga o le auai o lea tagata i totonu o Samoa e aveina atu po o le tuuina atu o lea faamatalaga molimau po o fesoasoani, po o le a lava le tulaga e i ai.

(2) Afai ua faamalieina le Loia Sili e faapea ua malie se tagata o ia lea na faia i ai se talosaga i se Malo i fafo i lalo o le faafuaiupu (1), e malaga mai i Samoa e aveina atu pe tuuina atu faamatalaga molimau po o fesoasoani e tusa ai o lea talosaga, e mafai e le Loia Sili ona faia fuafuaga ma lea Malo i fafo mo faamoemoega:

- (a) o le aumaia o le tagata i Samoa; ma
- (b) i le tulaga o se pagota mai fafo, taofia le tagata a o i ai i totonu o Samoa; ma
- (c) faafoi le tagata i le Malo i fafo; ma
- (d) isi mataupu e aliae mai e faasino i le talosaga.

12. E le faaeeina atu faasalaga pe a teena le tuuina mai o le maliega – Afai, i lalo o le fuaiupu 11 o lenei Tulafono, ua talosagaina e le Loia Sili le fesoasoani a se Malo i fafo i le faatulagaga o le auai o so o se tagata i totonu o Samoa, e le tatau

ona noatia le tagata o ia lea e faasino i ai le talosaga i so o se faasalaga po o noataga po o i se isi faiga e afaina ai i le tulafono i le na o le mafuaaga o le teena e lea tagata po o le lē mafai ona malie e auai atu e pei ona talosagaina.

13. Taofia o pagota mai Malo i fafo-(1) Afai o se tagata o ia lea o le a aumai i Samoa mai se Malo i fafo e tusa ai o se talosaga ua faia i lalo o le faafuuiupu 11(1) o se pagota mai fafo, ma ua talosagaina e lea Malo i fafo e faapea e tatau ona taofia lea tagata a o i ai o ia i totonu o Samoa, e tatau i lea tagata a o i ai i totonu o Samoa po o malaga mai i Samoa po o malaga atu i fafo e tusa ai o le talosaga, ona taofia i sea nofoaga puipuia e pei ona faatonuina e le Loia Sili i se faiga tusitusia.

(2) Afai ua faia se talosaga i lalo o le faafuuiupu (1), e mafai e le Loia Sili ona faia fuafuaga ma lea Malo i fafo mo faamoemoega o le:

- (a) aumaia o le tagata i Samoa; ma
- (b) taofia i le nofoaga puipuia le tagata a o i ai i totonu o Samoa; ma
- (c) faafoi le tagata i le Malo i fafo; ma
- (d) isi mataupu e aliae mai e faasino i le talosaga.

14. Puipuiga mausali ma tulaga aloaia-(1) I le noatia ma le fai fuafua i le faafuuiupu (3), e le tatau i se tagata o ia lea o lo o i totonu o Samoa e tusa ai o se talosaga ua faia i lalo o le fuaiupu 11 o lenei Tulafono:

- (a) ona taofia, molia po o le faasalaina i totonu o Samoa mo so o se soligatulafono lea e faapea na faia, po o lea sa faia, a o lumanai ai le malaga ese mai a le tagata mai le Malo i fafo e tusa ai o le talosaga; po o
- (b) ona noatia i so o se tualumaga tau le va o tagata i totonu o Samoa e tusa ai o so o se gaoioiga po o gaoioiga e le i faia lea e faapea na tulai mai ai, po o sa aliae mai, a o lumanai ai le malaga ese mai o le tagata mai le Malo i fafo e tusa ai o le talosaga, tualumaga tau le va o tagata lea e le mafai ona noatia ai le tagata pe afai e le o i totonu o Samoa; po o

- (c) ona manaomia le aveina atu po o le tuuina atu o faamatalaga molimau po o fesoasoani e faasino i so o se mataupu faasolitulafono i totonu o Samoa e ese ai nai lo le mataupu faasolitulafono lea e faasino i ai le talosaga; po o
 - (d) ona manaomia, e tali atu i taualumaga po o suesuega lea e faasino i ai le talosaga, i so o se fesili lea e le tatau ona manaomia le tali atu i ai o le tagata pe afai o ia taualumaga po o lea suesuega o lo o faia i totonu o se Malo i fafo; po o
 - (e) ona manaomia, i le taualumaga po o suesuega lea e faasino i ai le talosaga, le tuuina atu o so o se pepa aloaia po o meafaitino lea e le manaomia le tuuina atu e le tagata pe afai o ia taualumaga po o lea suesuega o lo o faia i totonu o le Malo i fafo.
- (2) Mo faamoemoega o le faafuaiupu (1), e faatagaina se tusi faamaonia moni atoatoa o puipuiga faaletulafono mai fafo i taualumaga e avea ma uluai molimau mausali o mataupu ua faamatalaina mai i totonu o le tusi faamaonia.
- (3) E le tatau ona faaogāina le faafuaiupu (1) i se tagata pe afai:
- (a) ua tuua e le tagata Samoa ma ua toe foi i se isi faiga e ese ai nai lo le talosaga lava lea po o se isi talosaga; po o
 - (b) sa i ai le avanoa o le tagata e tuua ai Samoa ma o lo o i ai pea i totonu o Samoa i se isi uiga e ese ai nai lo -
 - (i) le faamoemoe lea e faasino i ai le talosaga;
 - (ii) le faamoemoe o le tuuina atu o faamatalaga molimau i so o se taualumaga faasolitulafono ua faia i totonu o Samoa ua faamaonia e le Loia Sili, i se faiga tusitusia, e avea o taualumaga ia e manaomia ai le tuuina atu e le tagata o faamatalaga molimau; po o

(iii) le faamoemoe o le tuuina atu o fesoasoani e faasino i se suesuega i totonu o Samoa ua faamaonia e le Loia Sili, e ala i se faiga tusinga, e avea o se suesuega e faasino i le tulaga e manaomia ai le tuuina atu e lea tagata o fesoasoani.

(4) O se tusi faamaonia e tuuina atu e le Loia Sili mo faamoemoga o le faaparakalafa (3)(b)(ii) po o le 3(b)(iii) e aloaia mai le aso ua faamaoti mai i totonu o le tusi faamaonia ma e mafai ona amata faamamaluina mai le taimi ua tuanai.

15. Tapulaa o le faaaogāina o faamatalaga molimau – Afai o lo o i totonu o Samoa se tagata, e tusa ai o se talosaga ua faia i lalo o le fuaiupu 11, ma ua tuuina atu faamatalaga molimau i so o se taulumaga faasolitulafono:

(a) lea e faasino i ai le talosaga po o so o se taulumaga faasolitulafono lea e mulimuli mai i le suesuega lea e faasino i ai le talosaga; po o

(b) ua faamaonia e le Loia Sili e tusa ai o le faaparakalafa 14(3)(b)(ii) e tusa ai o lea tagata,

e le tatau ona faatagaina lea faamatalaga molimau pe faaaogāina i se isi faiga e ese ai i so o se moliaga o le tagata mo so o se soligatulafono e faia faasaga i tulafono a Samoa, e ese ai nai le tauto pepelo e tusa ai ma le tuuina atu o lea faamatalaga molimau.

16. Fesoasoani i le tuuina atu o pepa aloaia – Afai ua faamalieina le Loia Sili e faapea e talafeagai pe manaomia le tuuina atu o so o se taulumaga i se tagata o lo o i Malo i fafo e faasino i se mataupu tau solitulafono e faia i totonu o Samoa, e mafai e le Loia Sili ona talosagaina lea Malo i fafo e fesoasoani i le faataunuina o le tuuina atu o taulumaga.

17. Fesoasoani i le mauaina mai o meafaitino po o isi mea-(1) Afai ua faamalieina le Loia Sili e faapea o lo o i ai mafuaaga talafeagai mo le talitonuina ai e faapea o se meafaitino po o isi mea o lo o i se Malo i fafo e talafeagai i so o se mataupu tau solitulafono i totonu o Samoa, e mafai e le Loia

Sili ona talosaga lea Malo i fafo e fesoasoani i le mauaina mai o lea meafaitino po o sea mea.

(2) E ese mai ai nai le faafuaiupu (1), e le tatau ona faia se talosaga i lalo o lenei fuaiupu pe afai e aofia ai i le talosaga le maua mai o le meafaitino po o se mea e ala i le sailia po o le faoa faamalosia, seia vagana ai o le mataupu tau solitulafono e faasino i se soligatulafono ogaoga.

18. Talosaga mo le faamalosia o poloaiga ua faia i lalo o le Tulafono o Tupe Maua Mai i Soligatulafono – E mafai e le Loia Sili ona talosagaina se Malo i fafo e faia se faatulagaga mo le faamalosia ma/po o le faamalieina o se poloaiga e faamatuu atu ai, poloaiga o faasalaga tau tupe po o poloaiga e taofia ai ua faia i lalo o le Tulafono o Tupe Maua Mai i Soligatulafono, pe afai ua faamalieina atoatoa le Loia Sili e faapea o lea meatotino, ua faasino i ai se poloaiga mo le faamalosia o se poloaiga e faamatuu atu ai, se poloaiga o faasalaga tau tupe po o se poloaiga e taofia ai, o lo o i totonu o se Malo i fafo.

19. Talosaga mo le tuuina atu o tusi faapoloaiga po o poloaiga i Malo i fafo – E mafai e le Loia Sili, e faasino i se soligatulafono ogaoga, ona talosagaina fesoasoani mai i se Malo i fafo i le mauaina o se tusi poloaiga, poloaiga po o isi pepa faaletulafono e tutusa o latou uiga ma so o se tusi poloaiga po o poloaiga ua taua mulimuli ane i lalo o le Tulafono o Tupe Maua Mai i Soligatulafono:

- (a) se poloaiga e taofia ai; po o
- (b) se tusi poloaiga e sailia ai mo tupe maua mai i soligatulafono; po o
- (c) se poloaiga e tuuina atu ai; po o
- (d) se poloaiga e mataitu ai.

20. Faatapulaaina o le faaaogāina o faamatalaga molimau – So o se faamatalaga molimau, faamatalaga, pepa aloaia po o meafaitino lea e maua mai e tusa ai o se talosaga ua faia i lalo o lenei Vaega, e tatau ona faatoa faaaogāina mo faamoemoega o, po o e fesoatai ai ma le mataupu faasolitulafono lea e faasino i ai le talosaga, seia vagana ai:

- (a) le Malo i fafo lea e faasino i ai le talosaga na faia; ma
 - (b) le tagata, i le tulaga o so o se faamatalaga molimau, faamatalaga, pepa aloaia po o meafaitino ua maua mai se tagata a o i ai le tagata i totonu o Samoa e tusa ai o se talosaga ua faia i lalo o le fuaiupu 11,
- ua malie mai i le faaaogāina o le faamatalaga molimau, faamatalaga, pepa aloaia po o meafaitino mo so o se isi faamoemoe.

VAEGA III TALOSAGA E FAIA E MALO I FAFO

21. Faaaogāina o lenei Vaega – O se talosaga mo fesoasoani e tusa ai ma lenei Vaega e mafai ona faia e so o se Malo i fafo.

22. Talosaga e ao ona faia i le Loia Sili-(1) O talosaga taitasi uma e faia e se Malo i fafo mo fesoasoani i se mataupu faasolitulafono e tusa ai o lenei Vaega e tatau ona faia:

- (a) i le Loia Sili; po o
 - (b) i se tagata ua faatagaina e le Loia Sili e taliaina talosaga a Malo i fafo i lalo o lenei Vaega.
- (2) Afai ua fai se talosaga e se Malo i fafo i se tagata ua faatagaina i lalo o le parakalafa (1)(b), e tatau ona faatatauina o lea talosaga, mo faamoemoe o lenei Tulafono, e faapea na faia i le Loia Sili.

23. Faiga o talosaga-(1) E tatau i se talosaga mo fesoasoani ona:

- (a) tuuina atu ai le igoa o le pulega o lo o faafoeina le suesuega po o tualumaga o lo o faasino i ai le talosaga; ma
- (b) tuuina atu ai se faamatalaga manino o le uiga moni o le mataupu tau solitulafono ma se faamatalaga o lo o faatulaga mai ai se ototootoga o faamatalaga moni ma tulafono talafeagai; ma

- (c) tuuina atu ai se faamatalaga manino o le faamoemoe o le talosaga ma le uiga moni o le fesoasoani o lo o sailia; ma
 - (d) i le tulaga o se talosaga e taofia ai pe faamatuu atu ai ni meatotino ua talitonuina i ni mafuaaga talafeagai o lo o i totonu o Samoa, ia tuuina atu ai faamatalaga auiliili o le solitulafono o lo o fesiligia ai ni faamatalaga maoti o so o se suesuega po o tualumaga o le solitulafono, ma tuuina atu faatasi ma se ata o so o se poloaiga e taofia ai pe faamatuu atu ai; ma
 - (e) tuuina atu ai faamatalaga auiliili o so o se tualumaga lea e manaomia e le Malo ua talosaga e ao ona mulimulitaia e Samoa ina ia faamamaluina ai le talosaga, e aofia ai faamatalaga auiliili o le auala ma le faiga e ao ona tuuina atu ai so o se faamatalaga, pepa aloaia po o se mea, i le Malo i fafo e tusa ai o le talosaga; ma
 - (f) ia aofia ai se faamatalaga o lo o faatulaga mai ai so o se manaoga o le Malo o lo o talosaga e uiga i le tulaga puipuia e tusa ai o le talosaga ma mafuaaga o na manaoga; ma
 - (g) ia tuuina atu faamatalaga auiliili o le vaitaimi lea o lo o manao ai le Malo o lo o talosaga ina ia tausisia ai le talosaga; ma
 - (h) afai e talafeagai ai, ia tuuina atu faamatalaga auiliili o le meatotino e ao ona sailia, taofia, faoa faamalosi pe ave faamalosi ma mafuaaga e talitonuina ai e faapea o le meatotino o lo o i totonu o Samoa; ma
 - (i) tuuina atu so o se faamatalaga e mafai ona fesoasoani i le faamamaluina o le talosaga.
- (2) E mafai ona tuuina atu se talosaga mo fesoasoani soofaatasi mai se Malo i fafo e ui lava e faapea e le o usitaia e le talosaga le faafuuiupu (1).

24. Teena o fesoasoani – O se talosaga a se Malo i fafo mo fesoasoani i lalo o lenei Tulafono e mafai ona:

- (a) teena atoa po o se vaega pe afai, ua manatu le Loia Sili, o le talosaga e ono afaina ai le tulaga aoao, puipuigamalu po o isi aia taua a tagata lautele o Samoa po o e ono feteenai ma manaoga o le faamasinoga tonu; ma/po o
- (b) e tolopo ai atoa po o se vaega, pe afai, ina ua maea ai ona feutagai ma le Pulega Agavaa o le Malo i fafo, ua manatu le Loia Sili e faapea o le tuuina atu o le talosaga i lea lava taimi e faaono afaina ai le faafoega o se suesuega po o se tualumaga faa-faamasinoga i totonu o Samoa.

25. Faasilasilaga o le teena o talosaga – Afai ua teena se talosaga atoa po o se vaega o se talosaga a se Malo i fafo mo se fesoasoani i lalo o lenei Vaega, e tatau ona tuuina atu e le Loia Sili i le Pulega Agavaa se faasilasilaga o le teena o le talosaga a le Malo i fafo faatasi ai ma mafuaaga ua teena ai.

26. E mafai ona tuuina atu fesoasoani i le noatia ma le fai fuafua i tuutuuga – E mafai ona noatia fesoasoani ua tuuina atu i lalo o lenei Vaega i se Malo i fafo o lo o talosaga i tuutuuga e pei ona fuafuaina e le Loia Sili i so o se mataupu maoti po o vasega o ni mataupu.

27. Fesoasoani i le faailoaina po o le faailoagofieina o tagata-(1) E mafai e se Malo i fafo ona talosagaina le Loia Sili ina ia fesoasoani atu i le sailia, po o le faailoaina ma saili, se tagata ua talitonuina o lo o i totonu o Samoa.

(2) E mafai e le Loia Sili ona faataga fesoasoani e tusa ai ma lenei fuaiupu pe afai ua faamalieina le Loia Sili:

- (a) e faapea e fesootai le talosaga ma se mataupu faasolitulafono e faasino i se soligatulafono ogaoga na faia i le Malo i fafo; ma
- (b) e faapea o lo o i ai mafuaaga tatau e talitonu ai e faapea o le tagata o lo o faasino i ai le talosaga -

(i) e po o e ono aafia i, po o e mafai ona ia faia pe tuuina atu faamatalaga molimau po o fesoasoani e talafeagai i le mataupu faasolitulafono; ma

(ii) o lo o i totonu o Samoa.

(3) Afai ua faatagaina e le Loia Sili fesoasoani e tusa ai ma lenei fuaiupu, e tatau i le Loia Sili ona tuuina atu le talosaga i le pulega talafeagai i totonu o Samoa, ma e tatau i le pulega ona faaaogā ana taumafaiga aupito i lelei e sailia ai po o, i le tulaga e mafai ai, faailoagofie ma saili ia maua le tagata o lo o faasino i ai le talosaga, ma e tatau ona fautuaina le Loia Sili e uiga i le taunuuga o ia taumafaiga.

(4) I le mauaina o sea fautuaga, e tatau i le Loia Sili ona logoina le Malo i fafo o lo o talosaga e uiga i le taunuuga o suesuega sa faia e tusa ai o le talosaga.

28. Fesoasoani i le mauaina o faamatalaga molimau i totonu o Samoa-(1) E mafai e se Malo i fafo ona talosagaina le Loia Sili ina ia fesoasoani i le faatulagaina o le faamauina o faamatalaga molimau i totonu o Samoa po o le faia o pepa aloaia po o isi mataupu tusitusia i totonu o Samoa.

(2) Afai ua faamalieina le Loia Sili e faapea:

(a) e fesootai le talosaga ma se soligatulafono ogaoga i le Malo i fafo; ma

(b) o lo o i ai mafuaaga tatau e talitonuina ai e faapea e mafai ona faamauina le faamatalaga molimau pe faia le pepa aloaia po o le mataupu tusitusia i totonu o Samoa,

e mafai e le Loia Sili ona faataga le fesoasoani e tusa ai ma lenei fuaiupu.

(3) Afai ua faatagaina e le Loia Sili le aoina o faamatalaga molimau i lalo o lenei fuaiupu, e mafai e le Faamasino, i le noatia ma le fai fuafua i fuaiupu 29 ma le 30 o lenei Tulafono ma so o se tulafono faatonutonu ua faia i lalo o lenei Tulafono, ona faamauina le faamatalaga e ala i se tautoga o tagata molimau taitoatasi ua tulai i luma o le Faamasino, ma e tatau ona:

- (a) faia faamatalaga molimau i se faiga tusitusia ma faamaonia ua faamauina e le Faamasino le faamatalaga molimau; ma
- (b) ia auina atu lea tusitusiga ma pepa faamaonia i le Loia Sili.

(4) Afai ua faatagaina e le Loia Sili le tuuina atu o pepa aloaia po o isi mataupu tusitusia, e mafai e le Faamasino, i le noatia ma le fai fuafua i fuaiupu 29 ma le 30 ma i so o se tulafono faatonutonu ua faia i lalo o lenei Tulafono, ona talosagaina le tuuina atu o pepa aloaia po o isi mataupu tusitusia, ma ae vagana ai ua poloaia e le Faamasino se isi tulaga e ese ai, e tatau ai ona auina atu pepa aloaia po o ata o pepa aloaia (ua faamaonia e le Faamasino o ni ata faamaonia moni) po o isi mataupu tusitusia, i le Loia Sili.

29. Nisi aiaiga e faasino i le mauaina o faamatalaga molimau – I le noatia ma le fai fuafua i le fuaiupu 30 o lenei Tulafono, o tulafono a Samoa e tusa ai o le faamalosia o tagata e oo atu i luma o le Faamasinoga, ma ia tuuina atu ai faamatalaga molimau, tali atu i fesili ma tuuina atu pepa aloaia po o isi mataupu tusitusia, i luga o le fofogaina o se moliaga e faasaga i se tagata mo se solitulafono e faasaga i tulafono a Samoa, e tatau ona faaaogāina, i le tulaga e mafai ona oo i ai lona faaaogāina ma faatasi ai ma teuteuga talafeagai, e tusa ai o le faamalosia o tagata ina ia oo atu i luma o se Faamasino, ma tuuina atu faamatalaga molimau, tali atu i fesili ma tuuina atu pepa aloaia po o isi mataupu tusitusia, mo faamoemoega o le fuaiupu 28 o lenei Tulafono.

30. Puipuiga o tagata molimau-(1) Mo faamoemoega o le fuaiupu 28 o lenei Tulafono, o le tagata o ia lea e faasino i ai taualumaga tau solitulafono i le Malo i fafo ua agavaa ae le mafai ona faamalosia e tuuina atu se faamatalaga molimau.

(2) E leai se tagata e manaomia, e tusa ai o le fuaiupu 28 o lenei Tulafono, e tuuina atu faamatalaga molimau, pe tuuina atu pepa aloaia po o isi mataupu tusitusia, mo faamoemoega o so o se taualumaga i so o se Malo i fafo e tatau ona manaomia e tuuina atu so o se faamatalaga molimau, pe tuuina atu so o se pepa aloaia po o mataupu tusitusia, lea e le mafai ona

faamalosia le tagata ina ia tuuina atu pe faaoo atu i tualumaga i le Malo i fafo.

(3) E mafai ona taliaina loa se tusi faamaonia moni o puipuiga o tulafono i fafo, mo faamoemoega o le faafuaiupu (2) e avea o uluai faamatalaga molimau o mataupu ua taua i totonu o le tusi faamaonia.

(4) O tagata taitoatasi uma o lo o manaomia, e tusa ai o le fuaiupu 28, ina ia tuuina atu faamatalaga molimau pe faaoo atu pepa aloaia po o isi mataupu tusitusia mo faamoemoega o so o se tualumaga, e tatau ona i ai ia te ia tulaga aloaia e faasino i le taliina o fesili ma le faailoaina atu o pepa aloaia ma mea, e faapei ai o lo o talia ia tualumaga i totonu o le faamasinoga a Samoa.

31. Faafogea o tualumaga-(1) E mafai e se tagata o lo o faasino i ai tualumaga i lalo o le faafuaiupu 28(3) po o le (4) ma so o se isi tagata o lo o tuuina atu faamatalaga molimau pe faailoa atu pepa aloaia po o isi mataupu tusitusia i le fofogaina o mataupu ma le Pulega Agavaa a le Malo i fafo, ona oo atu ma avea se loia e fai ma ona sui.

(2) E tatau i le tusi faamaonia a le Faamasino ua faia i lalo o le parakalafa 28(3)(a) ona faailoa mai ai pe sa auai pe leai foi so o se tagata ua taua i totonu o le faafuaiupu (1) i le fofogaina o le mataupu ma, afai e faapea, pe sa i ai foi se loia sa fai ma o latou sui pe leai.

(3) Afai e faapea ona talosagaina e le Malo i fafo, e mafai e le Faamasino ona faataga se suesuega po o se fesiligia o se mataupu e ala i ata faaalua po o fesootaiga televavave faaonaponei mai lena Malo i fafo, o so o se tagata o lo o ia tuuina atu faamatalaga molimau po o saunia se pepa aloaia po o isi mataupu i le fofogaina e:

(a) so o se tagata o ia lea o lo o faasino i ai tualumaga i le Malo i fafo o lo o talosaga po o le loia o lo o fai ma sui o lena tagata; po o

(b) le loia o lo o fai ma sui a le Pulega Agavaa a lena Malo i fafo.

32. E mafai ona faatinoina e le Resitara malosiaga o le Faamasino-(1) E mafai e so o se Faamasino ona faataga le Resitara o le Faamasinoga Sili ina ia faatino malosiaga o se Faamasino i lalo o fuaiupu 28 e tusa ai o so o se mataupu maoti.

(2) E mafai ona faalēaogāina se pule faataga ua tuuina atu i lalo o le faafuaiupu (1) i so o se taimi e so o se Faamasino.

(3) Afai i so o se mataupu, e tusa ai ma le i ai i le Resitara o se puleaga i lalo o so o se faatagaga ua tuuina atu i lalo o le faafuaiupu (1), e foliga mai ai i le Resitara o se tasi lea o faafitauli faapitoa, e mafai e le Resitara ona faasee atu le mataupu i se Faamasino, o ia lea e mafai ona faapafala le mataupu pe tuuina atu i le Resitara faatasi ma ia faatonuga e pei ona manatu le Faamasino ua talafeagai ai.

(4) E leai se mea o i lenei fuaiupu e tataua ona taofia ai le faatinoina, e so o se Faamasino, o so o se pule faa-faamasinoga po o malosiaga ua faaeina atu i le Resitara i lalo o lenei fuaiupu.

33. Fesoasoani i fetuunaiga o le auai atu o se tagata e tuuina atu faamatalaga molimau i Malo i fafo-(1) E mafai ese Malo i fafo ona talosaga i le Loia Sili ina ia fesoasoani i le faatulagaina o le auai atu, i lenei Malo i fafo, o se tagata i Samoa (e le o le tagata lea o lo o faatatau i ai le fuaiupu 34) mo le faamoemoe o le tuuina atu po o le saunia o faamatalaga molimau po o fesoasoani e faasino i se mataupu tau solitulafono i le Malo i fafo.

(2) E mafai e le Loia Sili, pe afai ua faamalieina o ia e faapea:

(a) o le talosaga e faasino i se mataupu tau solitulafono e tusa ai o se soligatulafono ogaoga i fafo i se Malo i fafo; ma

(b) o lo o i ai mafuaaga talafeagai e talitonuina ai e faapea e mafai e le tagata o lo o faasino i ai ona tuuina atu pe lauina faamatalaga molimau po o fesoasoani talafeagai i lenei mataupu tau solitulafono; ma

- (c) o le tagata o lo o faasino i ai ua tuuina mai lona maliega saoloto e auai ai e pei ona talosagaina; ma
 - (d) ua tuuina atu e le Malo i fafo gaoioiga talafeagai e tusa ai o mataupu ua faamaoti mai i totonu o parakalafa 35(a),(b), (c), ma le (e),
- ua faatagaina le fesoasoani e tusa ai ma lenei fuaiupu ma e mafai ona fesoasoani i le faia o faatulagaga e faafaigofie ai lona auai.

34. Fesoasoani i le faia o fetuunaiga o le auai atu o se pagota-(1) E mafai e se Malo i fafo ona talosagaina le Loia Sili ina ia fesoasoani i le faia o fetuunaiga o le auai atu, i lena Malo i fafo, o se tagata i Samoa o ia lea o se pagota (o lo o taofia i le falepuipui pe leai) mo faamoemoega o le tuuina atu po o le saunia o faamatalaga molimau po o fesoasoani e faasino i so o se mataupu tau solitulafono e tusa ai o se solitulafono ogaoga i lena Malo i fafo.

(2) Afai ua faamalieina le Loia Sili e faapea:

- (a) o le talosaga e faasino i le auai atu o le tagata o lo o fitoitonu i ai i le fofogaina o se mataupu e fesootei ma so o se mataupu tau solitulafono e tusa ai o se solitulafono ogaoga i totonu o se Malo i fafo; ma
 - (b) o lo o i ai ni mafuaaga talafeagai e talitonuina ai e faapea e mafai e le tagata ona tuuina atu faamatalaga molimau talafeagai i tualumaga; ma
 - (c) ua faaoo atu le maliega saoloto a le tagata e tuuina atu ai faamatalaga molimau i le Malo i fafo; ma
 - (d) ua tuuina atu e le Malo i fafo ni gaoioiga talafeagai e tusa ai o ni mataupu o lo o faamaoti mai i totonu o le fuaiupu 35,
- e mafai e le Loia Sili ona faataga se fesoasoani e tusa ai ma lenei fuaiupu.

(3) Afai ua faatagaina se fesoasoani e tusa ai ma le faafuaiupu (2), e mafai e le Loia Sili:

- (a) i le tulaga o se pagota o ia lea o lo o taofia i le falepuipui, ona faatonuina ina ia tatala i tua le pagota mai le falepuipui o lo o taofia ai lea tagata mo le faamoemoe o le malaga atu i le Malo i fafo e tuuina atu faamatalaga molimau i le faamasinoga, ma e mafai ona faia fetuunaiga o le malaga atu o le pagota i le Malo i fafo i lalo o le puipuiga a se leoleo po o se tagata ofisa ole falepuipui ua tofia e le Loia Sili mo lea faamoemoe; ma
- (b) i le tulaga o so o se isi tagata ua tatalaina i tua mai le falepuipui ona o se palola po o isi poloaiga ua faatagaina i se laisene e faasaoloto ai -
- (i) ia faamaonia ma faia fetuunaiga o le malaga atu o le tagata i le Malo i fafo e tuuina atu faamatalaga molimau i le faamasinoga; ma
- (ii) ia mauaina ia faamaoniga, pule faataga ma faatagaga e pei ona manaomia ai mo le faamoemoe, e aofia ai le fetuunaiga, faalēaogāina po o le faataatia ese o tuutuuga o le tatalaina i tua o lea tagata, po o fetuunaiga, faalēaogāina po o le faataatia ese o le faasalaga o lea tagata po o tuutuuga o le faasalaga o lea tagata.
- (4) O se faatonuga e tuuina atu e tusa ai o le parakalafa (3)(a) e le Loia Sili e tusa ai o se pagota, e tatau ona avea ma pule faataga ua atoatoa mo le tatalaina o le pagota mai le falepuipui o lo o o taofia ai lea tagata, mo faamoemoe o le faatonuga.

35. Gaoioiga e manaomia mai Malo i fafo – E tatau i le Loia Sili, a o lumanai ai le faatagaina o le fesoasoani e tusa ai o fuaiupu 33 po o le 34, ona mauaina gaoioiga mai le Malo i fafo e faasino i mataupu ua taua e faapea:

(a) e le tatau i le tagata o lo o faasino i ai le talosaga ona-

(i) taofia, molia pe faasalaina mo so o se solitulafono e faasaga i le tulafono a le Malo i fafo e faapea ua tuuaia ai le faia, pe sa faia, a o lumanai ai le tuua e le tagata o Samoa; po o

(ii) noatia i so o se taualumaga tau le va o tagata e tusa ai o so o se gaioioiga po o se mea ua le faia e le tagata e faapea ua tuuaia ai sa faia, po o ua faia, a o lumanai ai le tuua e le tagata o Samoa, e avea o taualumaga tau le va o tagata lea e le ono noatia ai lena tagata pe afai e le i ai i le Malo i fafo lea tagata; po o

(iii) manaomia ina ia tuuina atu pe saunia faamatalaga molimau po o fesoasoani e tusa ai o so o se mataupu tau solitulafono i le Malo i fafo e ese mai nai lo le mataupu lea o lo o faasino i ai le talosaga,

ae vagana ai ua tuua e le tagata le Malo i fafo, po o ua i ai le avanoa e alu ese mai ai mai le Malo i fafo ma o lo o tumau lona i ai i lena Malo i fafo e ese mai nai lo le faamoemoe o le tuuina atu po o le saunia o faamatalaga molimau po o fesoasoani e tusa ai o le mataupu lea o lo o faasino i ai le talosaga; ma

(b) e faapea o so o se faamatalaga molimau ua tuuina atu e le tagata i taualumaga tau solitulafono lea o lo o faasino i ai le talosaga e tatau ona taliaina pe faalēaogāina i le isi tulaga e ese ai mai lona faaaogāina i le moliaga o le tagata mo se solitulafono e faasaga i se tulafono o le Malo i fafo e ese mai nai lo le solitulafono o le tauto pepelo e faasino i le tuuina atu o lena faamatalaga molimau; ma

(c) e faapea e tatau ona toe faafoi mai le tagata i Samoa e tusa ai ma tuutuuga ua malie i ai le Loia Sili i se taimi vave lava e mafai ai pe a maea ona tuuina atu le faamatalaga molimau; ma

(d) i le tulaga pe afai o le talosaga o lo o faasino i se tagata o ia lea o se pagota i Samoa ma ua talosaga le Loia Sili i le Malo i fafo ina ia faia tuutuuga mo le taofia o le pagota i lalo o puipuiga a o i ai lea tagata i totonu o se Malo i fafo; ma

(i) ia faia ni fuafuaga talafeagai mo lea faamoemoe; ma

(ii) ia le tatalaina i tua le tagata mai lalo o puipuiga i le Malo i fafo e aunoa ma se uluai faamaoniga a le Loia Sili; ma

(iii) afai ua tatalaina i tua le tagata i totonu o le Malo i fafo, i le talosaga a le Loia Sili, a o lumanai ai le faaiuga o taualumaga lea o lo o faasino i ai lea tagata, e faapea o nofoaga o lo o nofo api ai ma tupe alu a lea tagata o le a totogiina e le Malo i fafo; ma

(e) isi lava mataupu e pei ona manatu le Loia Sili ua talafeagai ai.

36. E le faaecina atu faasalaga mo le teena o le tuuina atu o maliega – E le tatau ona noatia le tagata o lo o faasino i ai le talosaga e tusa ai o fuaiupu 33 po o le 34, i so o se faasalaga po o se noataga po o se faiga faaituau o le tulafono e ala i se mafuaaga e tasi o le teena po o ua le mafai e lena tagata ona tuuina mai sana maliega e auai atu ai e pei ona talosagaina.

37. Taunuuga o le aveese atu i Malo i fafo o se pagota o lo o nofosala i le falepuipui – Afai o se pagota o lo o nofosala i le falepuipui mo se soligatulafono e faasaga i le tulafono a Samoa ua tatalaina i tua e tusa ai ma se talosaga a se Malo i fafo i lalo o le fuaiupu 34, e tatau i le pagota, a o nofosala ai i le falepuipui e tusa ai o le talosaga (e aofia ai le taofia i fafo atu o Samoa), ona faatatauina e faapea o lo o faaauau pea ona nofosala mo le taimi o lo o falepuipui ai.

38. Puipuiga o tagata e uia Samoa-(1) Afai o se tagata ua auina ese mai se Malo i fafo i lalo o se puipuiga e ui mai i Samoa agai atu i se isi Malo i fafo mo faamoemoega o le tuuina atu o faamatalaga molimau i se mataupu tau solitulafono i se isi Malo i fafo:

- (a) e mafai ona ui mai i Samoa le tagata i lalo o le puipuiga a se isi tagata; ma
- (b) afai o se vaalele po o se vaa lea o lo o malaga ai lea tagata e tulaueleele pe taunuu i se nofoaga i totonu o Samoa, e tatau ona puipuia pea lea tagata i lalo o se puipuiga e pei ona faatonuina e le Loia Sili i se faiga tusitusia seia oo ina faaauau le faigamalaga a lea tagata.

(2) Afai ua taofia i se falepuipui se tagata e tusa ai o se faatonuga i lalo o le parakalafa (1)(b), ma o le malaga a lea tagata e le faaauauina i le taimi e tatau ai, ina ia tusa ai o le manatu o le Loia Sili, e mafai e le Loia Sili ona faatonuina le faaooina atu o le tagata i se faiga puipuia i le Malo i fafo na malaga ese muamua mai ai le tagata.

39. Fesoasoani i le mauaina o meafaitino po o se mea e ala i le sueina ma faoa faamalosia-(1) E mafai e se Malo i fafo ona talosagaina le Loia Sili ina ia fesoasoani i le mauaina o se meafaitino po o se mea e ala i le sueina ma faoa faamalosia.

(2) Afai ua faamalieina le Loia Sili e faapea:

- (a) o lo o faatatau le talosaga i se mataupu tau solitulafono e tusa ai o se soligatulafono ogaoga i Malo i fafo; ma
- (b) o lo o i ai mafuaaga talafeagai e talitonuina ai e faapea o se meafaitino po o se mea e talafeagai i taualumaga o lo o i totonu o Samoa,

e mafai e le Loia Sili ona faatonuina se tagata ofisa faatagaina e talosaga i se Faamasino po o le Resitara o le Faamasinoga mo se tusi poloaiga e sueina ai e tusa ai o le fuaiupu 40.

40. Tusi poloaiga e sueina ai – E mafai e se Faamasino po o le Resitara o le Faamasinoga ona tuuina atu se tusi poloaiga e sueina ai e tusa ai o se mea lea ua faamalieina ai le Faamasino

po o le Resitara, po o le a lava le tulaga, e faapea e i ai mafuaaga talafeagai e talitonuina ai o lo o i ai i totonu po o i luga o se nofoaga po o se mea:

- (a) so o se mea o lo o i ai i luga po o e tusa ai o se soligatulafono ogaoga i fafo sa faia, po o ua masalomia sa faia; po o
- (b) so o se mea o lo o i ai mafuaaga talafeagai e talitonuina ai o le a avea ma faamatalaga molimau i le faia o sea soligatulafono; po o
- (c) so o se mea o lo o i ai mafuaaga talafeagai e talitonuina ai ua fuafuaina mo le faaaogāina mo le faamoemoe o le faia o so o sea soligatulafono.

41. Faiga ma mataupu i totonu o se tusi poloaiga e sueina ai – E tatau i tusi poloaiga taitasi uma ua tuuina atu i lalo o le fuaiupu 40 ona aofia ai i totonu vaega maoti ua taua e faapea:

- (a) fanua ma fale po o se mea e mafai ona sueina e tusa ai o le tusi poloaiga; ma
- (b) le soligatulafono po o ni soligatulafono ia ua tuuina atu ai se tusi poloaiga; ma
- (c) se faamatalaga o meafaitino po o mea ua faatagaina le faoa faamalosia; ma
- (d) le vaitaimi lea e mafai ona faatinoina ai le tusi poloaiga; ma
- (e) se isi lava tuutuuga po o vaega maoti e pei ona faamaotiina mai e le Faamasino po o le Resitara.

42. Malosiaga ua faaeina atu i le tusi poloaiga-(1) I le noatia ma fai fuafua i so o se tuutuuga ua faamaoti mai i totonu o le tusi poloaiga e tusa ai o le fuaiupu 41, e tatau i tusi poloaiga uma taitasi ua tuuina atu i lalo o le fuaiupu 40 ona faatagaina ai le tagata ofisa faatagaina ina ia faatino le tusi poloaiga:

- (a) e ulufale ai ma sueina le fanua po o fale ua faamaoti mai i totonu o le tusi poloaiga i so o se taimi i le ao po o le po a o faagasolo le faaaogāina o le tusi poloaiga; ma

- (b) ia faaaogā lea fesoasoani e pei ona talafeagai ai i tulaga aliae mai mo le faamoemoe o le ulufale atu ma sueina; ma
 - (c) faaaogā sea malosiaga e pei ona talafeagai ai i tulaga aliae mai mo faamoemoega o le faataunuaina o le ulufale atu ma le tatalaina malosi o so o se mea o i totonu, po o i le nofoaga po o fanua ma fale o lo o sueina; ma
 - (d) sueina ma faoa so o se mea o lo o taua i totonu o le tusi poloaiga.
- (2) E tatau ona i ai i tagata uma taitoatasi ua valaauina e fesoasoani atu i so o se tagata ofisa ua faatagaina e faatino se tusi poloaiga ua tuuina atu i lalo o le fuaiupu 40, malosiaga ua faamatala mai i totonu o parakalafa (1)(c) ma le (d).

43. Faoa faamalosi o isi mea – Afai, i le faagasologa o se suesuega i lalo o se tusi poloaiga ua tuuina atu i lalo o le fuaiupu 40, mo se ituaiga mea o lo o faamaoti mai i totonu o le tusi poloaiga, ua maua ai e se tagata ofisa faatagaina se isi mea, ua faatatauina le tusi poloaiga e faapea ua faatagaina ai le tagata ofisa ua ia faoa faamalosi le isi mea pe afai ua i ai ni mafuaaga talafeagai e talitonuina ai e faapea:

- (a) o le isi mea e talafeagai i le mataupu tau solitulafono e tusa ai o se soligatulafono ogaoga i se Malo i fafo, po o e tuuina atu ai faamatalaga molimau e uiga i le faia o se solitulafono i totonu o Samoa; po o
- (b) ua talafeagai le faoa faamalosi o le mea ina ia taofia ai i le nanaina, leiloa po o le faaleagaina, pe faaaogā e faia ai, faaauau ai pe toe faia ai le soligatulafono po o se isi soligatulafono.

44. Puipuia ma le lafoaia o mea sa faoa faamalosi-(1)
Afai ua faoa faamalosi e se tagata ofisa faatagaina so o se mea e tusa ai o se tusi poloaiga sa tuuina atu i lalo o le fuaiupu 40, e tatau i le tagata ofisa ona auina atu lea mea i lalo o le puipuiga a le Komesina o Leoleo.

(2) Afai e auina atu se mea ina ia i lalo o le puipuiga a le Komesina o Leoleo i lalo o le faafuaiupu (1), e tatau i le Komesina o Leoleo ona faatulaga mo lea mea ina ia tausia mo se vaitaimi e le silia le masina e tasi mai le aso talu ona faoa lea mea, e faatalitali ai se faatonuga mai le Loia Sili i se faiga e ao ona tagofia ai lenei mea (lea e mafai ona aofia ai se faatonuga ina ia auina atu lea mea i se Pulega Agavaa o se Malo i fafo).

(3) Afai, a o lumanai ai le faamutaina o le vaitaimi o lo o taua i totonu o le faafuaiupu (2), ua tuuina atu e le Loia Sili se faatonuga e tusa ai o lea mea, e tatau ona tagofia lea mea e tusa ai ma lea faatonuga.

(4) Afai e leai se faatonuga ua tuuina atu e le Loia Sili a o lumanai ai le faamutaina o le vaitaimi ua taua i totonu o le faafuaiupu (2), e tatau i le Komesina o Leoleo ona faatulagaina le toe faafoiina o lea mea i le tagata sa ia umia lea sa faoa mai ai, i se taimi vave lava e mafai ai ina ua tuanai le faamutaina o lea vaitaimi.

45. Ia tuuina atu e le Loia Sili le tusi faamaonia i le sueina ma le faoa faamalosia – Afai, e tusa ai o se talosaga ua faia i lalo o le fuaiupu 39 e se Malo i fafo, ua tuuina atu se tusi poloaiga e sueina ai i lalo o le fuaiupu 40, e tatau i le Loia Sili, i le talosaga a le Pulega Agavaa o lea Malo i fafo, ona tuuina atu sea tusi faamaonia e pei ona manaomia e lena Pulega Agavaa e uiga i le taunuuga o so o se suesuega sa faia e tusa ai o le tusi poloaiga, le nofoaga ma tulaga na aliae mai i le faoa faamalosia o so o se mea e tusa ai o le tusi poloaiga, ma le puipuia o mea ua faapea ona faoa faamalosia.

46. Fesoasoani i le faatulagaina o le faaooina atu o taualumaga-(1) E mafai e se Malo i fafo ona talosagaina le Loia Sili ina ia fesoasoani i le faataunuaina o le faaooina atu o se mataupu i se tagata i totonu o Samoa.

(2) Afai ua faamalieina le Loia Sili e faapea:

(a) o le talosaga e faasino i se mataupu tau solitulafono e tusa ai o se soligatulafono ogaoga i se Malo i fafo; ma

- (b) o lo o i ai mafuaaga tatau e talitonuina ai e faapea o le tagata e faaooina atu i ai le mataupu o lo o i totonu o Samoa; ma
- (c) afai o le talosaga e faasino i le faaooina atu o se tusi samania e tulai ai e avea o se tagata molimau i le Malo i fafo, ua tuuina mai ai e le Malo i fafo se gaoioiga talafeagai e tusa ai o mataupu ua taua i totonu o le fuaiupu 47,

e mafai e le Loia Sili ona faatagaina se fesoasoani e tusa ai o lenei fuaiupu.

(3) Afai o le faaooina atu o se mataupu ua faatagaina i lalo o le faafuiauupu (2) e tatau i le Loia Sili ona faatonuina le pulega talafeagai ina ia faia fetuunaiga o le faaooina atu o mataupu ma i sea mataupu e tatau i le pulega ona:

- (a) faaaogāina lana taumafaiga aupito sili e faaooina atu ai lea mataupu -
 - (i) e tusa ai ma taualumaga ua fuafuaina i totonu o le talosaga; po o
 - (ii) pe afai o ia taualumaga o le a le tusa ai ma le tulafono po o e le talafeagai ai i totonu o Samoa, po o pe afai e leai ni taualumaga ua fuafuaina, e tusa ai ma le tulafono a Samoa; ma
- (b) afai o le pepa aloaia -
 - (i) ua faaooina atu, auina atu i le Loia Sili mo le auina atu i le Malo i fafo o lo o talosaga, o se tusi faamaonia i le faaooina atu o; po o
 - (ii) ua le faaooina atu, auina atu i le Loia Sili mo le auina atu i le Malo i fafo, se faamatalaga o mafuaaga ua taofia ai le faaooina atu.

47. Gaoioiga e manaomia mai le Malo i fafo – E tatau i le Loia Sili, a o lumanai ai le faatagaina o le fesoasoani e faataunuu ai le faaooina atu i so o se tagata, o se tusi poloaiga e oo atu ai e avea o se tagata molimau i se Malo i fafo e tusa ai o le fuaiupu 46, ona maua se gaoioiga mai le Malo i fafo e faapea

o le tagata o lo o faatatau i ai le talosaga o le a le noatia i so o se faasalaga po o se noataga, po o e aafia i se faiga faaituau o le tulafono e ala i se mafuaaga e tasi o le teena po o le lē mafai e lena tagata ona tausisia le tusi poloaiga e ui lava i so o se faamatalaga e ese mai ai i totonu o le tusi poloaiga.

48. E leai se faasalaga e faaecina atu mo le lē tausisia o le tusi poloaiga – Afai, ua talosaga le Malo i fafo mo se fesoasoani mai le Loia Sili i le faatanunuuina o le faaooina atu i so o se tagata e tusa ai o le fuaiupu 46, o se tusi poloaiga e oo atu ai e avea o se tagata molimau i lena Malo i fafo, e le tatau ona noatia le tagata lea o lo o faasino i ai le talosaga i so o se faasalaga po o noataga po o faiga faaituau o le tulafono e ala i se mafuaaga e tasi o le teena po o le lē mafai e lena tagata ona tausisia le tusi poloaiga, e ui lava i so o se faamatalaga e ese mai ai.

49. Talosaga mo le faamalosia o poloaiga a Malo i fafo e aveesea faamalosi ai-(1) E mafai e se Malo i fafo ona talosaga i le Loia Sili ina ia fesoasoani atu i le faamalosia o:

- (a) se poloaiga a Malo i fafo e faalēaogā ai, ua faia e tusa ai o se soligatulafono ogaoga i Malo i fafo, e faasaga i se meatotino ua i ai se mafuaaga tatau e talitonuina ai o lo o i totonu o Samoa; po o
 - (b) se poloaiga o faasalaga tau tupe i Malo i fafo, ua faia e tusa ai o se soligatulafono ogaoga i Malo i fafo, pe afai o se vaega po o meatotino uma o i ai ua faamalieina ai le poloaiga i ni mafuaaga tatau e talitonuina ai o lo o i totonu o Samoa.
- (2) Afai ua faamalieina le Loia Sili e faapea:
- (a) o se tagata ua faamaonia faaletulafono i le soligatulafono o ia lea sa faapea ona faia i ai le poloaiga i fafo; ma
 - (b) o le moliaga ua faamaonia faaletulafono ma le poloaiga e le noatia i se isi talosaga tetee i totonu o le Malo i fafo,

e mafai e le Loia Sili ona tusi talosaga i le Faamasinoga mo le faamauina o le poloaiga a le Malo i fafo e faaleaoga ai po o le poloaiga o faasalaga tau tupe i Malo i fafo.

50. Talosaga mo le faamalosia o poloaiga a Malo i fafo e taofia ai-(1) E mafai e se Malo i fafo ona talosaga i le Loia Sili ina ia fesoasoani i le faamalosia o se poloaiga e taofia ai i fafo e tusa ai o se meatotino o lo o talitonuina o lo o i totonu o Samoa.

(2) Afai ua faamalieina le Loia Sili e faapea:

(a) o lo o faasino le talosaga i se mataupu tau soligatulafono e faasino i se soligatulafono ogaoga i fafo; ma

(b) o lo o i ai mafuaaga tatau e talitonuina ai e faapea o se vaega po o meatotino uma o lo o faasino i ai le poloaiga, o lo o i totonu o Samoa,

e mafai e le Loia Sili ona tusi talosaga i le Faamasinoga mo le faamauina o se poloaiga a Malo i fafo e taofia ai.

51. Auala e faamauina ai poloaiga a Malo i fafo-(1) Afai ua talosaga le Loia Sili i le Faamasinoga mo le faamauina o se poloaiga a se Malo i fafo i lalo o fuaiupu 49 po o le 50, e tatau i le Faamasinoga, pe afai ua faamalieina o ia e faapea ua faamamaluina le poloaiga, ona faamauina le poloaiga e tusa ai o lea tulaga.

(2) E tatau ona faamauina se poloaiga po o se teuteuga o se poloaiga, i totonu o le Faamasinoga e ala i le faamauina o:

(a) se ata o le poloaiga talafeagai po o teuteuga ua faamauina faailogaina e le faamasinoga po o isi pulega o lo o faia ia poloaiga po o teuteuga; po o

(b) se ata o lena poloaiga po o teuteuga ua faamaonia vave lava ina ia tusa ai ma le fuaiupu 69 o lenei Tulafono.

(3) Afai ua faamauina se poloaiga i totonu o le Faamasinoga e tusa ai ma lenei fuaiupu, so o se teuteuga ua faia i le poloaiga (a o lumanai ai pe ina ua tuanai ai le faamauina) e mafai ona faamauina i lea lava auala e pei ona faia ai le poloaiga, peitai o teuteuga o le a lē faamamaluina, mo faamoemoega o lenei

Tulafono ma le Tulafono o Tupe Maua Mai i Soligatulafono, seia oo ina faamauina ia mea.

(4) O se ata fesi o le poloaiga ua faamaufaailogaina po o ua faamaonia po o se teuteuga o se poloaiga, e tatau ona faatatauina mo faamoemoega o lenei Tulafono e tutusa lava ma le ata moni lea ua faamaufaailogaina po o ua faamaonia, ae peitai o le faamauina i le faaaogāina ai o le ata fesi e tatau ona faamuta lona aloaia i le faaiuga o le vaitaimi e 21 aso e amata faitauina i le aso o le faamauina seia vagana ai e faapea ua faamauina le ata faamaufaailogaina po o le ata faamaonia a o le i muta lea vaitaimi.

52. Taunuuga o le faamauina o poloaiga a Malo i fafo-

(1) O se poloaiga a Malo i fafo e faaleaoga ai ua faamauina e tusa ai ma le fuaiupu 51 e i ai lona taunuuga, ma e mafai ona faamalosia, e faapei ai o se poloaiga e faalēaogā ai ua faia e le Faamasinoga i lalo o le Tulafono o Tupe Maua Mai Soligatulafono ma tusia i le aso na faamauina ai.

(2) O se poloaiga a Malo i fafo o faasalaga tau tupe ua faamauina e tusa ai o le fuaiupu 51 e i ai lona taunuuga, ma e mafai ona famalosia, e faapei ai o se poloaiga o faasalaga tau tupe sa faia e le Faamasinoga i lalo o le Tulafono o Tupe e Maua mai Soligatulafono ma tusia ai le aso na faamauina ai.

(3) O se poloaiga a Malo i fafo e taofia ai ua faamauina e tusa ai ma le fuaiupu 51 e i ai lona taunuuga, ma e mafai ona faamalosia, e faapei ai o se poloaiga e taofia ai ua faia e le Faamasinoga i lalo o le Tulafono o Tupe Maua Mai i Soligatulafono ma tusia i le aso na faamauina ai.

53. Faalēaogāina o le faamauina o poloaiga a Malo i

fafo-(1) E mafai e le Loia Sili ona talosaga i le Faamasinoga mo le faalēaogāina o le faamauina o se poloaiga a Malo i fafo e faaleaoga ai o se poloaiga a Malo i fafo o faasalaga tau tupe i fafo po o se poloaiga a Malo i fafo e taofia ai ua faamauina e tusa ai ma le fuaiupu 51, pe afai ua faamalieina le Loia Sili e faapea:

- (a) o le poloaiga ua, talu ona faamauina i totonu o Samoa, ua faamuta ona toe faaaogāina i le Malo i fafo lea sa faia ai lea poloaiga; po o

- (b) ua talafeagai le faalēaogāina o le poloaiga i le amanaia ai o faatulagaga ua faia i le va o Samoa ma le Malo i fafo e faasino i le faamalosia o poloaiga o ia ituaiga; po o
- (c) sa faamauina le poloaiga i se auala e feteenai ma le fuaiupu 51.

(2) Afai ua talosaga le Loia Sili i le Faamasinoga mo le faalēaogāina o le faamauina o se poloaiga, e tatau i le Faamasinoga ona faalēaogā le faamauina ina ia tusa ai ma ia tulaga.

(3) Afai, e tusa ai ma le Tulafono o Tupe Maua Mai i Soligatulafono, ua faalēaogāina pe ua soloia se poloaiga mai fafo e faalēaogā ai, se poloaiga o faasalaga tau tupe mai fafo po o se poloaiga mai fafo e taofia ai, ua faamauina e tusa ma le fuaiupu 51, (i lona atoaga po o se vaega), o lena faalēaogāina po o le soloia ua mafai ona avea o se mafuaaga mo se talosaga e faalēaogāina ai le poloaiga i lalo o lenei fuaiupu.

54. Talosaga mo se tusi poloaiga e sueina ai e tusa ai o meatotino ua afaina-(1) E mafai e se Malo i fafo ona talosaga i le Loia Sili ina ia maua se tusi poloaiga e sueina ai e tusa ai o meatotino afaina ua talitonuina o lo o i totonu o Samoa.

(2) Afai ua faamalieina le Loia Sili e faapea:

- (a) e faasino le talosaga i se mataupu tau solitulafono e tusa ai o se soligatulafono ogaoga i fafo; ma
- (b) o lo o i ai mafuaaga tatau e talitonuina ai e faapea o le meatotino afaina e tusa ai o le soligatulafono o lo o i totonu o Samoa,

e mafai e le Loia Sili ona faatonuina se tagata ofisa faatagaina ina ia faia se talosaga i lalo o le Tulafono o Tupe Maua Mai Soligatulafono mo tusi poloaiga e sueina ai o lo o talosagaina i lalo o le faafuaiupu (1).

55. Talosaga mo le poloaiga e taofia ai-(1) E mafai e se Malo i fafo ona talosaga i le Loia Sili ina ia maua se poloaiga e taofia ai e tusa ai o meatotino ua talitonuina o lo o i totonu o Samoa.

(2) Afai ua faamalieina le Loia Sili e faapea:

(a) ua amatalia po o o le a amatalia taualumaga tau soligatulafono, i totonu o le Malo i fafo e tusa ai o se soligatulafono ogaoga i fafo; ma

(b) o lo o i ai mafuaaga tatau e talitonuina ai e faapea o lena meatotino, e mafai ona faapea po o ua avea o se mataupu o se poloaiga mai fafo e taofia ai o lo o i totonu o Samoa,

e mafai e le Loia Sili ona faia se talosaga i lalo o le Tulafono o Tupe Maua Mai i Soligatulafono mo le poloaiga o lo o talosagaina i lalo o le faafuaiupu (1).

56. Talosaga mo se poloaiga mo le auina atu o pepa aloaia-(1) E mafai e se Malo i fafo ona talosaga i le Loia Sili ina ia maua se poloaiga mo le auina atu o pepa aloaia e tusa ai o se pepa aloaia e sailia ai meatotino.

(2) Afai ua faamalieina le Loia Sili e faapea:

(a) o lo o faasino le talosaga i se mataupu tau solitulafono i se Malo i fafo e tusa ai o se soligatulafono ogaoga i fafo; ma

(b) o lo o i ai mafuaaga tatau e talitonuina ai e faapea o lo o i totonu o Samoa so o se pepa aloaia e sailia ai meatotino e faasino i le soligatulafono,

e mafai e le Loia Sili ona faatonu se tagata ofisa faatagaina ina ia faia se talosaga i lalo o le Tulafono o Tupe Maua Mai i Soligatulafono mo le poloaiga e pei ona talosagaina i lalo o le faafuaiupu (1).

57. Talosaga mo le poloaiga e mataituina ai-(1) E mafai e se Malo i fafo ona talosaga i le Loia Sili ina ia maua le poloaiga e mataituina ai.

(2) Afai ua faamalieina le Loia Sili e faapea:

(a) o lo o faasino le talosaga i se mataupu tau solitulafono i le Malo i fafo e tusa ai o se soligatulafono ogaoga i Malo i fafo; ma

(b) o lo o i ai mafuaaga tatau e talitonuina ai e faapea o faamatalaga e uiga i gaoioiga faapisinisi sa faia e ala i se teugatupe sa umia e se tagata maoti i se faalapotopotoga tau tupe i totonu o Samoa, e talafeagai i le mataupu, e mafai e le Loia Sili ona faatonuina se tagata ofisa faatagaina ina ia faia se talosaga i lalo o le Tulafono o Tupe Maua Mai i Soligatulafono mo le poloaiga ua talosagaina i lalo o le faafuaiupu (1).

VAEGA IV

TALOSAGA UA FAIA E SE TAGATA UA MOLIA PO O UA FAIA E AVEA AI MA ONA SUI

58. Talosaga e faia e le Loia Sili e avea ai ma sui o se itu tete-(1) Afai o se tagata ua molia i se taualumaga tau solitulafono (uluai taualumaga), e faasino i se solitulafono ogaoga i totonu o Samoa, ua talitonu o ia e faapea ua talafeagai mo faamoemoega o le taualumaga e faapea:

- (a) e tatau ona taliaina faamatalaga molimau i se Malo i fafo; po o
- (b) e tatau ona saunia se pepa aloaia i totonu o se Malo i fafo; po o
- (c) e tatau ona tuuina atu se mea po o isi meafaitino o lo o i totonu o se Malo i fafo ma afai e talafeagai, ia faoa faamalosi; po o
- (d) e tatau ona faia fetuunaiga mo se tagata o lo o i totonu o se Malo i fafo, ina ia oo mai i Samoa e tuuina mai faamatalaga molimau talafeagai i le taualumaga, e mafai e le tagata ua molia ona talosaga i le Faamasinoga mo se tusi faamaonia e talafeagai mo le faia ai o le faamasinoga tonu, mo le Loia Sili ina ia faia so o se talosaga talafeagai i le Malo i fafo i lalo o le Vaega II, ina ia:
 - (e) mafai ona talia le faamatalaga molimau; po o
 - (f) mafai ona tuuina atu le pepa aloaia; po o
 - (g) tuuina atu pe faoa faamalosi le mea po o meafaitino; po o

(h) mafai ona faia fetuunaiga ma le Malo i fafo.

(2) A o lumanai ai le faia o se faaiuga i le talosaga, e tatau i le Faamasinoga ona tuuina atu se avanoa i:

(a) vaega uma o le uluai taualumaga; ma

(b) le Loia Sili,

ina ia tulai i luma o le Faamasinoga ma fofogaina itu aloaia o le talosaga.

(3) I le faia o se faaiuga pe tatau ona tuuina atu se tusi faamaonia, e tatau i le Faamasinoga ona amanaia mataupu ua taua e faapea:

(a) pe e faaono faataga mai e le Malo i fafo sea talosaga ua faia e le Loia Sili i lona avea ai ma sui o le tagata ua molia; ma

(b) o tulaga o le meafaitino (se faamatalaga molimau, se pepa aloaia, se meafaitino, po o se mea) o lo o saili e maua mai e le tagata ua molia mai le Malo i fafo lea ua le mafai i se isi tulaga e ese ai ona avanoa mai; ma

(c) pe faaono talia e le faamasinoga o lo o fofogaina le uluai taualumaga le meafaitino i totonu o faamatalaga molimau i le taualumaga; ma

(d) le tau aloaia o le meafaitino, pe afai ua taliaina i totonu o faamatalaga molimau i le taualumaga, e tusa ai o so o se mataupu e faaono fuafuaina i totonu o le taualumaga; ma

(e) pe faaono faia se faiga faaituau le tonu i le tagata ua molia pe afai e le avanoa mai le meafaitino i le faaamasinoga.

(4) E le taofia i le faafuaiupu (3) le Faamasinoga mai lona amanaiaina o so o se isi mataupu e manatu ua talafeagai.

(5) Afai e tuuina atu e le Faamasinoga se tusi faamaonia:

(a) e tatau i le Faamasinoga ona auina atu se ata o le tusi faamaonia i le Loia Sili; ma

(b) e tatau i le Loia Sili, e tusa ai ma lea tusi faamaonia, ona faia se talosaga e avea ai ma sui o le tagata ua molia, i le Malo i fafo mo se fesoasoani i lalo o le Vaega II.

(6) Afai ua teena e se Malo i fafo se talosaga ua faia i lalo o le faafuaiupu (5), e tatau i le Loia Sili ona tuuina atu se tusi faamaonia i se faiga tusitusia i lea tulaga.

(7) O se tusi faamaonia i lalo o le faafuaiupu (6) o uluai molimau ia o faamatalaga moni o lo o i ai i totonu.

**VAEGA V
TALIAINA O FAAMATALAGA MOLIMAU MAI MALO
I FAFO**

59. Faamatalaina o uiga o upu mo le Vaega V – I totonu o lenei Vaega:

“taualumaga tau le va o tagata” o lona uiga o se taualumaga e ese mai i se taualumaga tau solitulafono;

“taualumaga tau solitulafono” e aofia ai:

(a) se moliaga faale faamasinoga mo se solitulafono; ma

(b) se taualumaga mo le tuuina atu o se tagata e suesueina mo se solitulafono; ma

(c) se taualumaga mo le faasalaina o se tagata ua faamaonia faaletulafono lona moliaga i se solitulafono;

“tulafono a Malo i fafo” o lona uiga o se tulafono (pe tusitusia pe le tusitusia) a se, po o ua faamamaluina i totonu o se Malo i fafo;

“meafaitino i fafo” o lona uiga:

(a) o le faamatalaga molimau a se tagata e faapea -

(i) sa maua mai ona o se taunuuga o se ituaiga talosaga ua taua i totonu o le fuaiupu 61; ma

(ii) ua tausisia ai le fuaiupu 63; ma

(b) so o se molimau faitiono ua faapipiina faatasi i le faamatalaga molimau; ma

(c) so o se vaega o le faamatalaga molimau po o se molimau faitino;

“taualumaga fesootai tau le va o tagata” mo se taualumaga tau solitulafono, o lona uiga o taualumaga e tulai mai ona o le mataupu autu lava lea e tasi o lo o mafua ai ona faia taualumaga tau solitulafono;

“Faamasinoga Samoa” o lona uiga:

- (a) o le Faamasinoga Sili a Samoa; po o
 - (b) o se faamasino po o se tagata e faia faaiuga o lo o galue i lalo o tulafono a Samoa; po o
 - (c) o se tagata po o se faalapotopotoga ua faatagaina i lalo o tulafono a Samoa, po o e ala i se maliega a vaega, ina ia fofogaina, taliaina ma suesue faamatalaga molimau;
- “Tulafono a Samoa” o lona uiga o se tulafono (pe tusingusia pe le tusingusia) a, po o ua faamamaluina i totonu o Samoa.

60. Taulumaga o lo o faaaogāina i ai lenei Vaega – O lenei Vaega o lo o faaaogāina i se taulumaga, ua i luma o se faamasinoga a Samoa, e faapea o se taulumaga tau solitulafono mo se solitulafono ua faia e faasaga i tulafono a Samoa po o se taulumaga fesootai tau le va o tagata.

61. Talosaga mo meafaitino a Malo i fafo – Ua faaaogāina lenei Vaega i faamatalaga molimau ua maua mai ona o se talosaga sa faia e po o mo le Loia Sili i se Malo i fafo mo se faamatalaga molimau a se tagata ma so o se molimau faitino o lo o faapipii atu i le faamatalaga molimau.

62. Manaoga mo faamatalaga molimau-(1) E ao ona faia se faamatalaga molimau i luma o se faamasinoga ua aloaia i Malo i fafo e uiga i tautoga po o faamaoniga po o i lalo o sea fautuaga po o lapataiga e pei ona mafai ona taliaina e le faamasinoga i Malo i fafo o lo o faatatau i ai, mo le faia o faamatalaga molimau i taulumaga ua i luma o ia faamasinoga.

(2) E mafai ona faia le faamatalaga molimau i totonu o se faamasinoga e le faatagaina ai ni tagata faalogologo.

63. Auala e faia ai faamatalaga molimau-(1) E mafai ona faamauina le faamatalaga molimau, po o i se faiga tusingusia lipine pueleo, po o lipine o masini vito.

(2) E le manaomia ona faia le faamatalaga molimau i le ituaiga e foliga i se faamatalaga tauto pe faia ai se tusitusiga ua siitia mai i se taualumaga i totonu o se faamasinoga i Malo i fafo.

(3) E ao ona faamaonia le faamatalaga molimau faatasi ma, po o ia tuuina atu faatasi ma se tusi faamaonia i lona tulaga o se faamaumauga ua tonu atoatoa o le faamatalaga molimau sa tuuina atu ma sa faia i le auala o lo o manaomia i le fuaiupu 62.

(4) O le tusi faamaonia ua faia i lalo o le faafuiaiupu (3) e ao ona:

- (a) faia e faapea ua sainia pe faamaonia e se faamasino, faamasino o le faamasinoga mauualalo po o se tagata ofisa o le faamasinoga o le Malo i fafo lea sa faia i ai le talosaga; ma
- (b) faia e faapea ua tauaveina ai se faamaufaaailoga aloaia po o se faamaufaaailoga a le Malo o le:
 - (i) Malo i fafo; po o
 - (ii) se pulega a se Malo i fafo o lo o fitoitonu i ai mataupu e faasino i le faamasinoga (e pei: o se Minisita o le Malo, se Matagaluega Faa-minisita po o se Matagaluega a le Malo, po o se tagata ofisa o le Malo).

64. E mafai ona faaogaina se meafaitino mai Malo i fafo e avea ma faamatalaga molimau – E mafai ona faauigaina se meafaitino mai Malo i fafo e avea o se faamatalaga molimau i totonu o se taualumaga o lo o faaogā i ai lenei Vaega, ae vagana ai:

- (a) i le fofogaina o taualumaga, e foliga mai i le itu ua faamalieina ai le Faamasinoga a Samoa e faapea o le tagata sa tuuina atu faamatalaga molimau o lo o faasino i ai o lo o i totonu o Samoa ma e mafai e ia ona molimau i le faamasinoga; po o
- (b) e faaono le taliaina lea faamatalaga molimau pe afai sa tuuina atu e le tagata o lo o i le faamasinoga; po o

- (c) i totonu o le tualumaga, ua faatonuina ai e le Faamasinoga a Samoa, i lalo o le fuaiupu 65, e faapea e le tatau ona faaaogāina le meafaitino mai Malo i fafo e avea o se faamatalaga molimau.

65. Faatonuga ina ia taofia le faaaogāina o meafaitino mai Malo i fafo-(1) E mafai e le Faamasinoga a Samoa ona faatonuina ina ia le faaaogāina se meafaitino mai Malo i fafo e avea o se faamatalaga molimau pe afai e aliali mai ua faamalieina le Faamasinoga a Samoa e faapea ua talafeagai lelei le faamasinoga tonu pe afai e le faaaogāina le meafaitino mai Malo i fafo e avea o se faamatalaga molimau.

(2) E aunoa ma le faatapulaaina o mataupu ia e mafai ona amanaia e le Faamasinoga a Samoa i le faia o sana faaiuga pe tuuina atu sea faatonuga, e tatau ile faamasinoga ona amanaia:

- (a) le tulaga o lo o faapea ona maua mai ai i le meafaitino mai Malo i fafo se faamatalaga molimau lea e le o mafai ona maua mai se isi tulaga e ese ai; ma
- (b) o le tau aloaia o le meafaitino mai Malo i fafo mo so o se mataupu e faaono faia i ai se faaiuga i totonu o tualumaga; ma
- (c) le tulaga e mafai ai ona faafinauina ni faamatalaga o lo o i totonu o meafaitino mai Malo i fafo, i le taimi sa faia ai ia faamatalaga, e ala i le fesiligia o tagata sa latou faia ia faamatalaga; ma
- (d) pe o le lē faaaogāina o se meafaitino mai Malo i fafo e tulai mai ai se tupe alu le fuafuaina po o se faatuai; ma
- (e) pe o le lē faaaogāina o le meafaitino mai Malo i fafo o le a faia ai se faiga faaituau:
- (i) i le itu tetee i tualumaga tau solitulafono; po o
- (ii) se vaega i tualumaga fesootai tau i le va o tagata.

66. Tusi faamaonia e faasino i meafaitino mai Malo i fafo-(1) E mafai e le Loia Sili ona faamaonia e faapea sa mauaina se meafaitino mai Malo i fafo ona o se talosaga sa faia i se Malo i fafo e, po o mo le Loia Sili.

(2) Ua faatatauina e avea (ae vagana ai faamatalaga molimau i se tulaga e ese ai ua faaaogāina atoatoa i se tulaga ua tulai mai ai le masalomia i se itu talafeagai) e faapea o le meafaitino mai Malo i fafo o lo o faamaoti mai i totonu o le tusi faamaonia sa mauaina ona o lena talosaga.

67. Taunuuga o le Vaega V i aia tatau e suesueina ai tagata molimau-(1) E leai se mea i totonu o lenei Vaega e faatapulaa ai se aia tatau a se tagata ua molia i se taualumaga tau solitulafono lea o lo o faaaogāina ai lenei Vaega ina ia suesue ai e lea tagata po o e se loia a le tagata ua molia se tagata molimau ua taliaina lena faamatalaga molimau e avea o se faamatalaga molimau i na taualumaga.

(2) Afai ua talosaga le tagata ua molia e faapea ia auai atu le tagata sa ia faia le faamatalaga molimau i le fofogaina o le faamasinoga i totonu o Samoa ina ia fesiligia, e tatau i le Faamasinoga ona lapatai atu i le tagata ua molia e faapea e mafai ona poloaiina le tagata ua molia ina ia totogi so o se tupe alu ua faatupulaia e le Malo i le aumaia o le tagata i luma o le Faamasinoga.

(3) E mafai e le Faamasinoga ona poloaiina le tagata ua molia ina ia totogi atu so o se tupe alu ua faatupulaia e le Malo i le aumaia o le tagata e auai atu ai e avea o se tagata molimau pea afai:

(a) ona o le talosaga, ua tulai ai le tagata i luma o le Faamasinoga e avea o se tagata molimau; ma

(b) e foliga mai i le Faamasinoga sa lē tatau, e lē taua ma e lē talafeagai le fesiligia o lea tagata i mataupu o lo o tuuina atu i totonu o taualumaga.

(4) O se tusi faamaonia ua sainia e le Loia Sili ua avea o se faamatalaga molimau o tupe alu ua faatupulaia e le Malo mo le faafuaiupu (3).

(5) O se aofai o tupe e tatau ona totogi e le tagata i le Malo i lalo o se poloaiga i lalo o le faafuaiupu (3) o se aitalafu tau i le va o tagata e tatau ona totogi e le tagata i le Malo.

(6) E mafai ona faamalosia se poloaiga ua faia faasaga i se tagata i lalo o le faafuaiupu (3) e faapei ai o se poloaiga sa faia i totonu o taualumaga tau le va o tagata ua faia e le Malo e faasaga i se tagata ina ia toe faaola ai se aitalafu sa tatau ona totogi e le tagata i le Malo ma o le aitalafu ua tulai mai ona o se poloaiga ua faatatau e avea ai o se aitalafu o le faamasinoga.

68. Faagaoioia o isi tulafono – E le o faatapulaa i lenei Vaega auala e faamaonia ai se mataupu, po o le faaaogāina o se faamatalaga molimau, i lalo o so o se isi tulafono.

VAEGA VI AIAIGA ESEESE

69. Faamaoniga o tulaga moni o pepa aloaia-(1) I le noatia ma le fai fuafua i le fuaiupu 20 ma le Vaega V ma tulafono faafoe o tulafono e faasino i se taliaina o faamatalaga molimau, so o se pepa aloaia ua mauaina, tuuina atu, pe faia e tusa ai o se talosaga ua faia i lalo o lenei Tulafono ma ua faamaonia atoa lona tulaga moni, ua taliaina e avea o faamatalaga molimau i so o se taualumaga tau solitulafono.

(2) Ua faamaonia atoa le tulaga moni o se pepa aloaia mo faamoemoega o le faafuaiupu (1) pe afai:

(a) ua avea e faapea ua sainia pe faamaonia e se Faamasino, se Faamasino o le Faamasinoga Maualalo po o se tagata ofisa aloaia i totonu po o se Malo i fafo; ma

(b) pe:

(i) ua faamaonia e ala i se tautoga a se tagata molimau po o se tagata mau tofi o le Malo o se Malo i fafo; po o

(ii) ua avea ua faamau faailogaina i se faamaufaaailoga aloaia po o le faamaufaaailoga a se Malo i fafo po o se Minisita o le Malo po o se Matagaluega po o se tagata mau tofi o le Malo o se Malo i fafo.

(3) E leai se mea i totonu o lenei fuaiupu e taofia ai le faamaoniga o so o se mataupu po o le taliaina o faamatalaga molimau o so o se pepa aloaia, e tusa ai ma so o se isi tulafono a Samoa.

70. Tulaga taualoa o pepa aloaia mai Malo i fafo-(1) I le noatia ma le fai fuafua i le faafuuiupu (2), o se pepa aloaia ua auina atu i le Loia Sili e se Malo i fafo e tusa ai ma se talosaga a Samoa, o se tulaga aloaia lea ma e leai se tagata e tatau ona ia faailoa atu i so o se tasi lea pepa aloaia, po o ona faamoemoega, po o mataupu o lo o i totonu o le pepa aloaia po o so o se vaega o lea pepa, a o lumanai ai le faalauaiteleina o le pepa aloaia, i le tausisia ai o tuutuuga ia sa auina atu ai, pe faailoa atu a o faagasolo ma mo faamoemoega o so o se taualumaga.

(2) E leai se tagata o lo o umia se pepa aloaia ua taua i totonu o le faafuuiupu (1), po o se ata o lea pepa, po o o ia lea e i ai lona iloa i so o se faamatalaga o lo o aofia i totonu o le pepa aloaia, e tatau ona manaomia, e tusa ai ma so o se taualumaga faaletulafono, ina ia tuuina atu le pepa aloaia po o le ata po o e tuuina atu ai se faamatalaga molimau e faasino i so o se faamatalaga o lo o i totonu o le pepa aloaia.

(3) Ae vagana ai i le tulaga o lo o manaomia i lalo o lenei Tulafono ina ia faia se talosaga i le Malo i fafo mo se fesoasoani soofaatasi i mataupu tau solitulafono, e leai se tagata e tatau ona ia faailoa atu:

- (a) le faamatalaga moni e faapea o lea ua maua le talosaga; po o
- (b) mataupu o lo o i totonu o le talosaga; po o
- (c) le faamatalaga moni e faapea ua talia pe teena lea talosaga.

(4) So o se tagata ua faalavelaveina le faafuuiupu (1) po o le (3) ua ia faia se solitulafono ma e tatau ona noatia i luga o se moliaga ua faamaonia faaletulafono:

- (a) i le tulaga o se tagata moni i se sala tupe e 500 iunite tau faasalaga po o le nofosala i le falepuipui mo le lima (5) tausaga, po o faasalaga uma e lua; po o
- (b) i le tulaga o se faalapotopotoga ua tuufaatasia faaetulafono i se sala tupe e 2,500 iunite tau faasalaga.

71. Faasoaina ma Malo i fafo o meatotino ua aveesea faamalosi – E mafai e le Loia Sili ona faia se fetuunaiga ma le Pulega Agavaa o se Malo i Fafo mo le faasoaina tutusa ma lena Malo o se vaega o so o se meatotino ua maua:

- (a) i le Malo i fafo, ona o se taunuuga o le tagi sa faia e le Loia Sili e tusa ai o le fuaiupu 18; po o
 - (b) i totonu o Samoa, ona o se taunuuga sa faia i Samoa e tusa ai o le fuaiupu 49,
- e pei ona manatu le Loia Sili ua talafeagai.

72. Ia teuina tupe maua mai meatotino ua aveesea faamalosi i le Faaputugatupe o Aseta ua Aveesea Faamalosi – So o se tupe maua mai meatotino afaina, lea sa:

- (a) aveesea faamalosi i totonu o se Malo i fafo e tusa ai o se talosaga a Samoa i lalo o le fuaiupu 18; po o
 - (b) ua aveesea faamalosi i totonu o Samoa e tusa ai o se talosaga a se Malo i fafo i lalo o le fuaiupu 49,
- i le tulaga ua maua ai le avanoa i lalo o so o se fetuunaiga e faasoa ai meatotino ua aveesea faamalosi, po o se isi tulaga e ese ai, e tatau ona teuina i le Faaputugatupe o Aseta ua Aveesea Faamalosi.

73. Tulafono Faatonutonu-(1) E mafai e Le Ao o le Malo, i le faia i luga o le fautuaga a le Kapeneta, ona faia tulafono faatonutonu e faatonuina ai mataupu:

- (a) ua manaomia po o ua faatagaina i lena Tulafono ina ia faatonuina; po o
- (b) ua tatau po o ua talafeagai ina ia faatonuina mo le tauaveina po o le faamamaluina o lena Tulafono.

(2) E aunoa ma le faatapulaaina o le tulaga lautele o le faafuaiupu (1), e mafai ona faia tulafono faatonutonu mo le faamoemoe o le:

- (a) faatonuina o pepa o talosaga, faasilasilaga, tusi faamaonia, ma isi pepa aloaia mo faamoemoega o lenei Tulafono; po o
- (b) faatonuina o le taualumaga e ao ona mulimulitaia i le tagofiaina o talosaga ua faia i lalo o lenei Tulafono ma aiaia ai mo faasilasilaga o taunuuga o tagi sa faia e tusa ai o so o se talosaga; po o
- (c) e faatonuina ai taualuamaga mo le mauaina o faamatalaga molimau po o le tuuina atu o pepa aloaia po o e tusa ai o le fuaiupu 28; po o
- (d) e aiaia ai le totogiina o totogifuapauina, alauni ma tupe alu i malaga i so o se tagata i totonu o Samoa o ia lea e tuuina atu pe saunia faamatalaga molimau po o fesoasoani e tusa ai o se talosaga ua faia i lalo o lenei Tulafono; po o
- (e) ua faia ai soligatulafono ma faasalaga mo le solia o ia solitulafono e oo atu i se tulaga aupito i maualuga e 100 iunite tau faasalaga.

74. Soloaiga – O se talosaga mo se fesoasoani po o se poloaiga lea sa faia i lalo o le Vaega V o le Tulafono o Puipuiga mai Tupe e Faaofi mai Faasolitulafono 2000 ma e le i faia i ai se faaiuga i le amata faamamaluina o lenei Tulafono, e tatau ona faatatauina o se talosaga po o se poloaiga ua faia i lalo o lenei Tulafono ma e tatau ona faamaeaina pe fuafuaina i se isi faiga e ese ai e tusa ai ma aiaiga o lenei Tulafono.

**O le Tulafono o Fesoasoani Soofaatasi i Mataupu tau
Soligatulafono 2007 o lo o faafoeina e le Faletupe Tutotonu o
Samoa**

**Lolomiina e le Failautusi o le Fono Aoaofaitulafono,
i le pule a le Fono Aoaofaitulafono.**